



秋錦山房外集目錄

第一卷 尺牘一

與汪鈍翁

與徐健菴

復友

復梁藥亭

與友

與周青士

復友

與懸崖大師

與茅匡餘

復孫退谷先生

與某

與施鼎升

與顧茂倫

與胡澹思

復蘇茂旂

復友

答蘇茂旂

與吳孟舉





與友

與曹實菴

與程周量

與王阮亭

與曹升階

與汪蛟門

與葉元禮

與朱竹垞

與繆苻谿

與友

與周潛岳

與半完翁

與查聲山

與邵得愚

與沈山子

答丹崖翁

與古雲和尚

與曹中峽

與趙天羽

與周簞谷

與施愚山

與周潛岳

答徐健菴

與葉九來

與俞含暉

答蓼園從祖

又

與沈季銘

復吳孝章

與王星紉

復查聲山

復周潛岳

復錢爾載

復屠展馭

復徐健菴

與錢武子先生

第二卷 尺牘二

與顧寧人

與高謬苑

復徐健菴

與汪鈍翁

與陳其年

與徐勝力

與杜肇余

與趙雷文先生

與吳修齡

與龔蘅圃

與朱竹垞

與龔蘅圃

復耿孝伯

與譚左羽

與繆于野

與徐健菴

與顧祈叔

與查夏重

復汪鈍翁

復徐敬可

與天生兄

答徐淮江

答小友

與南溟弟

復劉元歎

與徐菘塍

復葉九來

與曹澹餘

復沈方鄴

復徐健菴

答蔣丹崖

與沈山子

答澹園從祖

答徐健菴

與爾載

與葉九來

與朱竹垞

答尋壑兄

復查聲山

與友

與友

與友

與曾止山

與龔蘅圃

第三卷 尺牘 三

與吳虎文

答錢子湘先生

與徐秋田



答東梧

答周簞谷

與徐果亭

答拙公

與汪鈍翁

與徐立齋

與錢爾載

又

與周林於

與周青士

與朱人遠

答鮑聲來

與竹垞

復宋漫堂

與某

答高江村

與王星紉

答周林於

與友

答友

答高江村

與王令貽

答劉幼功

與查聲山

答徐菘塍

與呂山澗

又

復錢魚山

答錢爾載

與邵子湘

與查聲山

答友

復宋牧仲

與高畧苑

與柯寓匏

與鮑聲來

與陸義山

答陸端毅

與譚護城

與徐健菴

答徐淮江

答高畧苑

與朱竹垞

答江村

與查聲山

與友

與友

與徐敬可

與某

與簞谷

秋錦山房外集目錄畢

門下後學金

壽彭  
德興 校訂

元孫旦華編錄

秋錦山房外集卷一

嘉興 李良年 武曾

尺牘一

與汪鈍翁

先生高臥賤子北行人事之不平思之殊失笑也既已俯視一切當世名碩吾黨素士益望茗華書屋如函關紫氣矣敝全學徐虎侯吾鄉孝子也又世其尊人士白先生之學文何妙理得心應手浙西諸家愛重其人而珍惜其所製自弱冠已然然虎侯食力奉母橐不歸細君雖終歲勤劬無所積也茲游吳中首謁先生冀得月旦一言廣為噓植先生愛士不遺一藝虎侯宜在升堂



之列若某之亟介於門下者則以知虎侯深不欲令孝子絕技爲興盡之返耳平生不妄言先生或能鑒之十月南還趨侍左右瀕發草草希宥

與徐健菴

奉別遠游大非始念先生旣淡鑒此心而又維持引掖若恐其顛躓於中路者古人所謂感恩知己於閣下兼之自分迂疎了無他想嚴冬歸侍几席以畢本懷憺園楓菊未敢寒盟也別後輕裝已戒適家叔明遠過送語及今秋車騎將臨敝郡索一言先左右家叔少從婁東拂水諸先生游彼時門戶凋零未甚從容著述尚有淵源二十年來食貧課子戶外事絕不聞也然獨願見名

賢恐後先生可以知其意所尚矣禮加縫掖不得不望諸吐握之門又舍弟名某者沉潛苦學今家叔率以晉謁冀附門牆之末蓬衡風味疎樸無狀所恃太邱道廣有教無類或進而收之特紹介非其人彌增悚仄耳約山家叔業荷生成之德茲再領餘輝東海流風被寒家爲獨厚榮施何量某實與之矣瀕發未申百一

復友

青兄詩落韻無不佳極合尊詠可謂二難矣弟刻欲勉酬尚未愜意正如捲蘆征戍一聞簫管之音不自知其中輟也夜氣稍清或能了此耳

復梁藥亭



和全山房文集卷一  
屢得佳篇不啻陽關三唱此游子厚幸乃又煩書扇耶  
馬首春風時堪吟對知兄愛我深也長水集從廢簾中  
搜得一本又不全并不足充覆瓿奈何

附來簡

梁佩蘭

即晤即別何匆匆也吾輩相逢正不可草草長歌奉  
送以見意扇字特不佳耳素綾承命書復花田離支  
之約願兄無忘秦山滿奚囊時便望文旌東指有人  
立南海扶胥口以待者必梁生也周量舍親囑致少  
間成詩奉送大著并領不盡

與友

追游秉燭隔宿宛然塵事相催即浮舟入郭矣文數首

求賜點抹歸來美景不移春風依舊未免有情當更問  
落花淡處也冗中畱白

與周青士

某白近狀已悉前書因足下詢及塞上文游輒復寓此  
僕近得一胡進士東甌東甌祖某僕從曾祖某同登宋  
羽皇榜有世好遂雅相善也東甌曾爲邑令兵亂解組  
迄今二十年足不涉戶外吏於此者咸折節下之東甌  
堅臥不肯出其祖父皆以科名在仕籍有聲而敝廬數  
椽頽然野田荒圃中藝蔬釀酒自給而已僕始登其堂  
執通家之禮見再拜畢東甌但詢僕家世論詩文不及  
他事項之一少年捧茗椀入室衣冠肅然拱揖有節即



東甌長公昨歲登賢書者也僕斂容東甌徐云家貧無  
應門止一老蒼頭方爲客治雞黍僕嗟嘆其風歡飲竟  
日夕自此往還不絕竊謂大江以南縉紳習於侈靡其  
子弟稍自振拔輒趾高氣盛不復知古人質朴事此無  
論晚近即百年以前有識者譏之而東甌家世廉謹不  
以科名自矜飾如此是可語足下而足下尤當廣其說  
以告東南諸貴游也

復友

云云領悉自不待諄示也鄉人事聞小有言正宜速懲  
之此非宋襄仁義時耳未得面問用是滋歎牛女之數  
弟償兄舊物之半頻見齒及殊可汗浹

與懸崖大師

自某遠遊薊朔而吾師高隱銅宮定水風幡靜躁殊異  
差幸奉教以來障礙稍除不敢以道上車塵與山間鐘  
磬作分別想也然造詣未淡畢竟居山習靜乃有進步  
秋風起時擔簦歸矣聞彼中可以採茶種竹微區此外  
復何求哉茅屋數椽伏惟畱意行踐宿約

與茅匡餘

長安奉教歡逾故鄉自折柳津亭又涼暄五易矣弟奔  
走東西荒山天末中時時懷想未審屋梁落月之餘亦  
曾夢見李生落拓無聊之狀否去臘抵家舟帆頓阻自  
謂得紆櫂青溪一接言笑而塵緣綿結逡巡未果又以



嘉兄長逝不忍再過西州天不降仁芝焚蕙折親知凋  
謝如此至今枕席猶有淚痕想長兄同此情也但去年  
自沈行可兄診視久聞勿藥之喜而垂成復敗深惜其  
不善攝生今則已矣寡鵠孤雛天必不終絕之惟是愛  
莫能助後死之慙弟則深矣行可古道照人想長兄深  
悉弟不敢贅陳儻貴鄉知交仰祈推引臨箋不盡神馳  
復孫退谷先生

去冬賜和大篇幾令韻無險字韓蘇偏師固不足折先  
生之一矢而逃方後學拜識津梁謹焚香盥手而後藏  
之永以爲則也比日避喧郊外闕焉奉教專謝不一

附來簡

孫承澤

連日風寒未敢約譚便中乞同錫兄命杖擁爐煨芋  
少見老農風味也承示佳韻謝謝

與某

丹山鳳翥仙圃芝生天際丰裁望均朝野某自辛亥長  
安不揣微末偶一通名即承青眼以下里之鳴繆忝西  
園文讌名篇大誨紉佩五中嗣以浪游荒徼萍梗去來  
星霜五易自此東閣之傷無被褐之跡也比聞先生讀  
禮南旋午橋暫憩道里不多遼闊川原尚隔中央向風  
引睇神夢雙飛曩者惠示大集手錄存笥盥手焚香而  
後敢讀詞旨高深還逾海嶽扶衰起盛玉戛金鳴此真  
希世之音匪止增光拙選俟棗梨竣事當專馳掌記也



但羣言如林名地爲多未審先生肯分几案之餘以佐其不逮否俚句四章小箋三種謹呈覽教作者盛心瑕瑜並錄或不罪其唐突耳敝同學沈行可諱某者積學工文師韓康之術向客嶺表名賢折節文之謂其品其術並非今人也茲來貴郡敬附荒槭極知元禮之門攀登不易但以至誼關切仰冀進而教之儻得藉鼎呂一言品題增重則豈惟身受者紉結即曹邱與有榮施矣

與施鼎升

都門旅寄得拜車聲挹清輝侍言笑爲邸中快事此後台旌南發弟亦漂泊西南一身如葉言念疇昔每有停雲落月之思抵舍以來百端文集未得買舟祇謁頃沈

行兄歸自茗中云與長兄聚首罨畫溪頭備承款渥頌不去口兼述近履清嘉雖文園雅稱善病而元龍未除豪氣河清雲撥展布以時爲親從生輝有日也弟契闊頻年鴻疎自媿竊意草野微末久不挂長者之臆乃聞垂詢殷然尚記長安陳跡始知長兄不遐棄之自此青溪雲樹倍淡馳溯矣行兄品誼無兩醫道兼臻絕頂嶺南聲價世多有耳食之者長兄旣識其人弟何敢復贅今行兄再過仙鄉所恃爲指南惟是一二知交而長兄月旦則藻鑑之領袖也弟知行兄此往必有遇合更過嶺南時矣因風肅勒冗次不宣

與顧茂倫



方今閉戶著書不脛而走海內吳越之間先生一人而已某等自庚戌春和一過浣花草堂得見顏色嗣是江湖南朔每念起居乞食浮生問奇莫遂牢愁聚散之慨當亦長者所惻然也近稍還集里門躬耕侍母收拾殘編惟是先集數種向求大選想丹黃已畢特屬季弟走謁九頓以領先生功在表章當代知言家不啻錦織聖俞之詩枕秘中郎之帙儻藉元晏一言俾三世遺書不終湮滅此感在存沒豈獨某等啣結已也分應偕叩適阻塵事不腆侑緘另單上供所冀莞存更賜斧正至於一字三縑之報敬矢五中尚圖嗣布未敢率然先生筭述等身其已付棗梨如閒情驪珠山左四家諸本統希示讀并宣坊值以便專馳臨穎可勝禱切

與胡澹思

上元把晤時長兄困於逢迎而弟追隨止數刻翻爲怨事別後赴崑山寸心猶不去左右也雲間姚君隱鷗寄跡在禪儒之間而才品高絕識者傾服畫法入董巨之室直坐元四家於廡下不止拚其鄉先哲也寫青山以供菽水亦高人亦孝子兩峯文藪吾兄法眼持刺奉謁必能相賞於塵壒之外但世事漸移疇能問冷淡生活者此則隱鷗固自知之不敢煩長兄以所難但指南之車則惟知已是藉耳斯兄球兄及諸位同人並希叱候冗布未備



復蘇茂旂

雅集後即移寓朗園未得晤謝拜讀來詠筆力清矯橫  
九州矣轉折類髯公而氣厚則從前人來不負此游客  
子良幸未敢當者獎借耳日間稍完閱史之課容和博  
笑斃復不莊柬

附  
來簡

蘇  
銘

今早方知移寓朗園從此草木皆可敬矣少間攜拙  
橐求法眼鑒定一見芝宇情如水乳文道真有一段  
不同人者耳

復友

南船悵別遂越雙旬卻望高齋眷戀無已弟雖與世浮

沉而賞心托足湖山半之正不欲童子鴻因人熱也接  
手教冀望殷勤兼之慰藉故人情重具見於此好音如  
夢恐不可得耳舍間尺素杳然季弟比狀亦從尊緘始  
聞見時幸爲傳語調攝之外無他囑也

答蘇茂旂

朗園夕陽冉冉負手西向正憶先生杖履出郊之約而  
疊札見示並賜大集發函狂喜何可言顧有感極而媿  
者某僻處一隅初無知識會饑驅走四方山川師友麤  
益見聞而懶惰因循不能嚮學迄今無所成就頃來頴  
上得侍長者兼飲緒言竊謂疎慵晚進且未敢自進於  
弟子之列而乃不蒙吐棄猥辱繩收重以華獎過情新



篇儼贈循分撫衷又何以仰酬萬一乎此則感極而媿尚冀先生有以教其不逮也大集敬畱俟沉酣三復而後敢返明日枉駕園中掃榻以待

附來簡

蘇銘

弟銘日來飲食坐臥於秋錦山房寧但貧兒驟富直如三家村裏牛郎方持不利之鋤自理荒穢忽遇天風吹入瑤宮閭苑目蕩魂搖真出於意外之意外間嘗遐觀海內文人屈指風雅宗匠如王阮亭之冰肌玉骨天遣裁詩施愚山之涵養淵深顛撲不破劉蒲菴之俊快出脫不持一體皆若鳳毛麟角非可易及今得啓先生篋笥覩先生玉貌兼得聆先生之緒言

直彙諸君子之長於一人乃歎陳思王獨得八斗之說信不誣也弟何人斯敢與吟倡之末然人即至愚未有過公輸之門而不一問繩墨又況先生樂育爲心吐握下士凡竹頭木屑牛溲馬勃無不收之藥籠而銘顧當面鎔過去後悔追豈不愚者終愚愚且更愚乎以故醜顏抄惡句數十首起於甲寅季冬以至今日之所作者蓋以弟學詩鄙志始於朗園同公勇讀書日也公勇才學遠不逮先生然亦先生流亞其誨我固不倦矣願先生以公勇教我之心下教小子使弟頂禮菩薩之後得皈依佛祖獨是鈍根凡夫未可微笑拈花令其解脫須用金鋼痛棒嗔喝庶幾同



登彼岸耳吁嗟乎弟子求師師亦須弟子望先生明  
鑒此忱不我遐棄幸何如哉縷縷不盡

與吳孟舉

心傾文采耳習聲名歲月已淡也雲亭百里自笑疎違  
年來兩拜大刺兼辱和章三百年塵土再覩菁英起衰  
鉅手昔有昌黎今二之矣頃從東海坐上聞許借異書  
弟方畱滯玉峯計得與觀良幸斷簡遺編蒐藏不易自  
絳雲旣燼天一迢然物必聚於所好能不神馳黃葉村  
乎饞眼儉腹終擬一登大雅之堂向古香殘墨中作片  
時消受也家兄斯年再訪之便遙候起居并爲同人代  
購尊選想不靳敕掌記耳冗次率畧主臣

與友

某再拜分手僅逾兩月而相思有甚三秋吾兄之念我  
行人亦必猶此矣渡江以來曾附數行當塵清照弟自  
廣陵解纜漕水嚴停逡巡彌月始復捨舟遵陸驢背走  
東昌而主人清介意頗殷勤無關痛癢更聞晉撫逐客  
太原游屐落落如晨星凝祉石樓需其禁弛方圖把臂  
鄉園同好旣隔山河逆旅舊遊招尋未便人生有情能  
無愴恨林於仍理本色遠人傾動否弟奔走風塵毫無  
佳趣惟是人情土俗往往發之於詩今錄以就正并博  
諸君子一粲也家間百凡惟望照拂南風無間惠我瑤  
章馳溯之極



與曹實菴

某不走候問於先生前爲歲者再知先生必訝其疎戾  
即某亦自歎爲眞疎戾也關河杳邈傳聞異辭伏處荒  
村追惟曩誼不獨先生有對牀之感矣此種情懷非可  
托諸筆墨僅以寒暄數字仰塵掌記揆之鄙意未獲所  
安是以久負此疎戾之讐也卽信繹聯備聞清望兼悉  
台履珥筆金門之暇著述等身當不減杜陵淒激耳憶  
昨棲遲天末驛使裝書郵牋乞句天倫多贈答之章賤  
子荷品題之目此時此樂何可再尋鷓鴣竹雞已成陳  
跡如何如何候鴈將南有可釋區區慕念者得賜手書  
微詞見慰幸不淺矣肅此奉候起居令叔四先生令公  
子世兄想俱佳勝統祈聲致不宣

與程周量

某兩過長安辱先生之教最深自亥春拜別邈隔雲山  
不敢輒煩掌記致疎上候祇呈拙刺一種從驛使附曹  
中翰處諒塵雅鑒矣昨聞先生榮任桂林計日旌車南  
發天末依依不獲與折柳之役敬賦小詩以當驪唱伏  
惟覽粲弟秋杪東還自此躬耕壟畝回憶京華晤對知  
愛逾涯豈勝永矢先生道經里第故人梁屈相見并希  
叱候北望沈寥臨牋馳切

與王阮亭

癸丑秋末去漳鄉而東會驛使捧蜀道集至手錄以歸



更畱三日後泊武陵有小緘卻寄巫陽轉上石火電光  
俄焉陵谷恐不復入記室矣某三走長安辱先生知愛  
自慚濩落有負品目年來伏處荒村長鑱託命土室拜  
母於陵灌園而外無足爲先生告者可發一嘆也自西  
樵先生下世覺煙雲黯然藝林蕭瑟曾製輓章以詞不  
工尚思改作未敢就正伏念曩日追隨文酒極布衣從  
事之樂一轉眼間而合肥退谷典型徂謝安邱南海遠  
作羈人此亦似關氣運獨不知先生何以爲懷耳舍弟  
符字分虎其詩不習嘉隆倚聲不專歐九秦七浪游十  
年而貧日甚今束裝北上謂不得一見先生則此行無  
色某繆被翦拂舊矣敢不避內舉懇先生一言教之生  
不願封萬戶侯此某初志即符志也臨紙馳仰不盡

與曹升階

客冬手書賜答仰荷垂憶更辱見懷倚聲撫昔念今情  
詞婉折拜讀之餘百端交集矣今春晤蛟門先生於維  
揚更述近履河清可俟雙龍易合蠻風蚤雨慮不足減  
眠食耳庭始之變初聞泣下再聞駭愕天道至今日亦  
不可問矣爲文哀之慘痛閣筆僅畱半橐容續畢寄呈  
也舍弟分虎來遊長安特令晉謁儻出其撰著請正幸  
先生推所以教某者教之舍弟曩遊皆爲夢境今潦倒  
而北統邀獎借庶靈臺無息炊之歎耳冗次率候搖筆  
神逞



與汪蛟門

奉別旗亭倉皇挂席夏首東還一詩畱東想徹掌記自後舍弟分虎至維揚再屬走候則車騎整裝矣舍弟遊踪萍轉獨未到淮以北而景行之慕最切此行不值自嘆緣疏舟次贈詩有金自還家盡詩從涉險多之句同人傳播以爲知言今舍弟將遊都下語某曰庶幾得見蛟門先生雖垂橐可以不恨某亦何敢譽弟敬述舟兄贈言爲媒俾飽聆塵論口必有所助發也同行舍親吳某詩才清麗訪令兄權使於崇文願見顏色並屬先容縷懷未布執筆馳越

與葉元禮

自長兄通籍金閨文章始有定價喧傳山野額手移時屏跡荒涼追惟曩詒長安並馬分燈尚如昨日事而弟棲遲隴畝菁華晬晚遊處俱困不審何時得奉言笑念之惘惘舍弟分虎向曾接清芬於敝里今遊都下先覲故人愚兄弟不善生產賣文遠遊事畧相等舍弟此行遇不遇未可知而長兄則旅人所依也著作等身久未快讀今且奏朱弦清廟之章何日自天而降令菰蘆中人擲瓦缶以聽耶洗耳俟之空函悚切

與朱竹垞

兄不能歸弟不能出長此離羣無可語者日枕一編仰屋而已家伯兄計當入楚分虎又北去老母髮白弟萬



無遠游理祇恐餅粟盡故人何以策我也年過四十一  
切都悔漸覺與世味無所羨亦無所爭競從此便如槁  
木死灰若會得本原更具殺活作用天資拙鈍苦未易  
了徹耳十兄才名見於時久矣東西南北二十年所至  
亦思菟裘娛老否乎人生若涉大海回頭便有實地歛  
才歸道此吾真菟裘也敢用相質道履想佳健文盎靜  
攝其學可畏補兄未竟有日矣兄尚苦貧爲他人作嫁  
衣勞勞不止耶兩日有所悼懷率布不備

與繆荅

搭聯奉到稍須補闕耳佐以筆二矢真可謂鷲毛矣但  
用以橫掃千人裝陸賈之橐祝頌之意具焉祈勿鄙我

也尚有札附錫爾兩兄處餘情俟走走併悉

與友

春風雨槩已泊津頭敢云元禮之仙舟亦期有道之共  
載耳

與周灑岳

寒食歸里聞近緒扼腕久之木老又言局外諸君間有  
因風揚波者此固不足駭亦可嘆也然亦宜置之罔聞  
耳貴鄉衆正相維燕公力護與有感慕想得高枕風濤  
外矣此番返舍只畱三四日極欲走鹽官面盡種種知  
事已稍定輒復中止彼此需陳統識心曲前札已見聲  
山如果入吳自得把晤也冗次草草殊覺惘然



與半完翁

今年初客鹿城端陽以後僕僕道途了無寧息聞先生  
筮天水之占竟踈趨候嗣知終吉庶不致小人道長深  
慰予懷半完詩酒天所以成曠志圍碁破賊益見謝公  
雅量矣姪比年生事蕭然不料徵書濫及隨例趣裝本  
無顛望而檝馬之需多從借貸真覺事與志違先生相  
知深亦必以爲嘆矣潦倒南歸當在歲寒再候杖履也  
聞問久闕負悚良深發行硯草草布意不盡

與查聲山

鹽中一再聚並屬匆匆手音旋寄便如與知己話別河  
干也此行雖在發軔而末後一著早已料見所恃胸中

初無得失十月歸來仍作解衣相對耳聞援例已就固  
是才人無可奈何之想然亦方今捷徑秋菊黃時當在  
長安聽好音矣出門事中心藏之俟得當乃報向時酬  
應啓橐焚若亂絲承切問已令兒子細檢奉採擇斷弗  
示人且須即付歸非謂可存誠慮將來老嬾再作此生  
活不能搜索枯腸故欲畱之耳諸再報不盡

與邵得愚

鄙人寡緣天不令早見先生又不獲早讀先生之詩若  
文頃者翻藉塵緣匆匆解后亦一奇也交蓋甫傾周旋  
曲至古道殷然感深而歎別後頗聞近緒意不欲行事  
勢所迫進退維谷亦年運中應有此一番星霜奔驟耳



手教勤勤佩相期之切如慚惶無地何桂句法書珍之  
懷袖馬首新涼如親言笑長途足以自娛惟此而已舍  
弟入省藉手遙頌輕裝雖北心實南依臨牋惘惘

與沈山子

弟年來餬口不暇事緒無端進退維谷冒暑涉江頗類  
妄人所爲然胸中正自了了流年月將中應有此一番  
失意往復雖欲逃之不能也長兄知我或不冷觀相笑  
乎望後歸來旦晚理鞭絲林亭咫尺未得話別亦以南  
還不遠只在楓落吳江之候耳懸和尚所遺諸橐雖曾  
語及見託而弟時在玉峯比復奔馳連接岷公從未相  
授長兄畱意編校不忘臨訣之懷幸甚幸甚專布未備

答丹崖翁

蒲節歸來日與塵緣奔逐西莊風月頻繞夢懷不自知  
奉違丰采忽忽又經年也手書見及仰荷注存但期許  
過分轉增慙汗耳都門之役向在躊躕近看大局勢不  
自由置長林麋鹿於車如流水之中豈惟無益適重困  
耳辦裝殊艱計中元左右始得首涂家兄以考職在京  
邸分虎偕趙農部畱武林辱惠問殷殷備書奉報瀕行  
尚圖走別台前再盡縷曲

與古雲和尚

某頓首送返吳山不侍法席久矣今復有都下之行沙  
白塵紅長爲勞者回首清涼境界自嘆緣疎昨者走候



會飛錫遠臨震澤不獲面盡款曲僅畱數語而歸想蒙  
清聽春間南院掩龕某適滯玉峯杖履南賁闕焉迎侍  
比悉種種涵覆之弘與有榮藉數月以來副寺後人瘁  
一手足之力撐持荼苦諒久在和尚明鑒之中但祖席  
不可久虛善信依依懷舊咸翹首願慈航再渡不止院  
中切雲霓之望也昨晤方伯王先生亦同此意肅請非  
遙某何人斯敢先諸公而有言第以皈依有素遠遊在  
即不得不預布區區之私十月歸來冀相見於梅溪丈  
室中則幸甚矣

與曹中峽

長兄館名地得賢主人對佳弟子下帷著述日盛月新

視弟浮生碌碌無一善狀不啻判鴻溝絕棧道欣企之  
餘彌增媿悚頃木文來晤快悉動定良會何時臨風延  
睇而已木文向承青眼屢爲弟言之今擬游都下有所  
商於鹽中維持引掖長兄自所不靳木老亦有心人寧  
忘盛美便候并及不宣

與趙天羽

被德甚深施者固始終不倦而受者若視爲固然於此  
仰見先生意量之大也辦裝維艱今始就緒準於廿四  
日去落帆亭矣近聞絡繹將來定無以仰酬期許十月  
之文當復從軒車閒話殘楓賸菊間耳瀕行率布不宣

與周簞谷



和金山房夕集卷一  
節後歸來亟欲把晤而長兄先數日赴梧川矣種種無由面盡悵然可知岷公屢過話及懸和尚行述未有捉筆者此事非長兄不能他屬也平生閱歷盡在意中宜詳書之臨去洒然向時不甚有道心人悔敬信之不早以爲已緣之薄乃聞長兄候疾時懇懇以吾兩人爲念對弟亦嘗言之夫豈有所不忘於世耶此意亦令人慨然耳駕歸小暇幸即過星紉處振筆了此儻未暇爲文且直記始末俾星紉錄二通一存岷公處可也弟牽強出門典質盡而稱貸隨之年命使然又將誰尤異時霜雪中裘敝履穿里兒拍手而胸中不自掩抑獨尋故人於采山堂者非他人也

與施愚山

連日論文拜教得未曾有惜行篋不帶隻字無以請正然歸憎其貌正恐他時亦難出手蒙獎許之過感竦并極大著容澄心盥指細讀報謝并附小跋也

附  
答簡

施閏章

試期已逼又兼寒疾只尺不得過從爲恨無已拙文辱指示感甚但媿溢美難受耳謝謝早間偶作春雪詩一首儻興到賜和爲望切勿一一拘韻近人爲韻所限或礙好詩直是作韻非作詩耳何如

與周潛岳

夏末出門一路小有耽延接舍間信開函得手牘又蒙



新詞藉以佳扇名帖贈遠人之意良厚弟此番得失不待智者而判有迫而行正如近日徵兵遣戍逐隊驅馳飲至論功別有所屬豈能羣冀封侯之賞乎札中期望殷殷感則固深竊謂疎於料事矣別所見託是乃素念祇恐三千里外鱗鴈浮沉難爲照應耳儻可委折相就斷不坐失事機以負勤懇也皜亭處一札希爲轉致

答徐健菴

行裝載德坐閱歲時翹首南雲不禁依戀汝南月旦得之名流藏弄落拓微踪過蒙記注感極而慙日祝起居安善伏聞純孝致妨尊視援琴已屆此以禮節性之候仰惟珍護某自去秋一病藥裏相延自顧弁荒必無所

就將來史局量在舉行懷材嚮風大不乏人貧女機絲晨炊自給使織天家之異錦累年莫殫其將束細腰乎攢眉去之不待智者始決矣屢承汲引盛懷祇有仰戢高深俯嗟自棄耳初入都門一緘奉候計皖轡旋時早塵籤室夢想難忘惟是禮編一書開元禮初謂極易乃成最難舌敝耳聾枝梧百出今始知爲大宗伯所借仍須主者索歸見發尚爾耽延然終期得當以報台命試期當在月抄某過此便行奉教不遠冗次未申百一

與葉九來

都門聚散追思如夢游自車騎南返而弟亦不耐逗畱轉客濠梁正念知己首春拜教狂喜移時佳刻之貽里



語且附不朽敬謝弟嘗思天下事出意想所不到者便是佳話曩時體仁閣下賦才詩伯與九來頡頏者有幾而君家學士公方以文章爲主上所嚮信內舉不避何嫌何疑乃所遭異是此弟所謂意想外也如弟不近世味不習攀附卿相猶化工也適還其本願幸甚幸甚來書推獎逾分豈意所安耶半繭佳園暑殘涼進先生坐讀文莊水部遺書於千章靜綠中視滾滾軟紅毋論達人自不以彼易此即盛名難留他日孤鶩終勝羣飛耳此間雖隔一江時有便風動定勿靳相報

附答簡

葉奕苞

旗亭分袂忽忽歲餘懸念知心荒函瀆聽蒙不我棄

惠以瓊枝捧讀之次如蓮芝宇暮雲春樹之思慙爲之釋且聞比來蓮花幕中意興不減吾兄自當乘長風破萬里浪獻賦不遇天必有以位置吾兄者依劉王粲斷非得已也至來諭云弟之失路不由天而由人長安道上自有公評以吾兄憐惜故人作此憤懣之語豈知行使止尼斷斷乎由天而不由人也弟戢影菰蘆仰天獨嘯竊得樂天知命之益不然王維夏□近夫皆客死不歸銘旌官號何足道耶尊作三友園記將同愚山春及軒記鈍翁歸雲閣記壽梓別郵呈覽儻有便鴻伏望仁兄長賜教益不盡

與俞含暉



去秋弟從京師轉客濠右故鄉音耗久隔殘冬風雪中  
喜符谿先生亦自南來首詢尊公先生起居驚聞仁兄  
已罹大故少微化石文獻無徵淚迸神悽所感慨非一  
事弟夙昔寡諧兼以師友零落比年以來獨於尊公先  
生有知己之佩方冀歲間歸里手一編以追隨几杖詠  
陶餘年今則已矣千里依人尚虛絮炙罪歉如何道駕  
至江右遊計量不岑寂讀禮之暇保遺言以竟家學此  
仁孝所先春秋一書尤善藏之弟明春肅叩總帷并欲  
請以卒業也

答蓼園從祖

叩別尊前衣更三葛心懸左右坐臥兼之繆天兄來接

叔祖誨帖悉近祉嘉暢將復理快游之屐津梁漸暑想  
首涂當俟新秋耳姪孫自都門潦倒有辜期望濠右之  
招相率便赴正以互鄉耳目未應添此落莫歸人原不  
獨爲餬口計也但此中差能作達一切諉之時命至箇  
事委曲總可笑嘆容他日奉侍以茗話銷之年來代作  
嫁衣幾無剗暇久疎上候荷叔祖不罪其無狀垂問殷  
切鉢之膺骨矣家中百凡知承庇照惟是終年落拓遠  
違菽水實覺浮生可厭而里中遂傳爲已死非叔祖至  
情相解幾無以慰白髮跪讀之餘祇有感泣別諭已謹  
佩之但世味逾下以杯水待神龍者未敢輕議家門凋  
落所幸諸叔振起在即叔祖優游杖履茂膺多福此則



千里之外所遙祝耳孫愷老向曾託候渠近在閩中俟到鳳時當爲致意

又

夏五一函寄候諒投籤室矣溽暑初秋想脂車戒楫尚未暇及靜戶修林叔祖興居定能百福但姪孫飢驅不能歸侍長聆誨言爲自恨耳濠右屢災頃復患水土風刁悍民情倉皇地主攢睂相對幕中之人意味可知在家常患貧出門貧如故不堪爲叔祖備述冬春之交力圖省母跪覲左右以悉種種也

與沈季銘

昨拜答草聞如嫂之訃深爲知己扼腕不如意事常八九古人遇此惟有達觀望兄以理遣情勿過煩悲也弟連日小劇亦由積憊俟免藥便圖赴唁但稽後爲罪耳

復吳孝章

弟自都門垂翅萍轉濠上旅跡支離自歎身名如葉爲里黨揶揄久矣乃荷同好記存懇惓下及感戢甚深也近履清暢得之天兄頗悉讀集杜大編不能去手豈獨鍼神密製便爲無縫天衣而騷屑頽唐時形寓託竟是吾孝章詩非少陵詩也能不嘆腕有化工乎令弟瞻今聞移居石街想亦往還無間希爲聲候去年不獲把晤至今猶悵然耳西莊先生前特望叱名并頌疇昔升齋令岳並諸同人統致是禱



復王星紉

前歲出門極承摯念初謂不久言歸便圖快聚不意逗  
畱經年既而倦翮無聊萍蹤飄轉生計日拙時命使然  
夫復何尤惟是言念知己遠疎晤對每悵然於心耳繆  
天兄從里中來畧述一二事真有江河日下之歎長兄  
杜門靜觀自饒佳趣此今日第一籌也弟落拓無成近  
際涼暄相判之後不我遐遺惟藉戚好一切統祈照及  
歸時九頓以鳴頌耳爾安頃試必已高掇抑或先曾援  
例未獲確音祇有遙祝天心兩兄幸爲道候并謝疇昔

復查聲山

匆匆作別轉眼便經三暑馬足長安幾同惡夢生涯惟

頓依然傭值簿書之間眞浮世贅人總無善狀可告知  
已音候久疎良亦爲此向承緘札畱之敝麓最無聊賴  
中檢點一當清對遠道纏綿如是而已近履佳安著述  
饒富可以遙測思所以爲蠟屐之地惜未得當已悉之  
潛岳字中曩在都下屈指人文多有聞聲山而願見者  
新詞膾炙恨所寄止半纒耳韜荒令叔前聞赴星沙頃  
又移踪他適之耗想不寂莫夏重德尹兩令叔都望聲  
候勞人易衰頗堅歸思歲闌相見故人定訝其髮白也  
不盡

復周潛岳

去夏都門看諸公登史館振衣相慶同時下第者未免



不平其二三知愛或聞而歎之然鄙人胸中止有齊物  
論在總以此事真實受用處了了易見大不如人不過  
他日銘旌少數巨字耳但此可自信若舉似互鄉必謂  
夫夫自解嘲矣抵濠上又將彌年從無片語寄候文知  
正以寂莫陳人自遠爲宜旣不欲異同遂并疎候每懷  
近緒惟增悵結乃荷手音不倦念我寒裝貽之襲繭舊  
兩纏綿何以爲報耶桐川一席非鈍翁之言輕於秋葉  
實因弟爲作合遂不足重輕耳付之一笑可也客中見  
聞所及思畱潛岳聲山之地以廣聲應奈機事輒相齟  
齬不勝快然然何敢忘之文會漸興里居差不寂莫第  
盛則必爭此社事習氣波瀾從此而生去其陋習而樂  
羣敬業眞名教中快事也弟代作嫁衣簿書叢雜舊硯  
殘毫蕪廢久矣遙聞勝集惜未躬逢耳祝端老素所心  
儀便乞致候尊公先生兩令弟統冀叱名中峽有札賜  
問另便作答鹽中諸同好並舍表弟公卓尋干相聚時  
一一幸道意音問雖疎此心殊不隔也

復錢爾載

里門作別時地屢更夢寐相依如見顏色想彼此同之  
弟學術弁荒逢時技拙去年潦落乃分所宜僅爲諉命  
之嘆則猶自欺欺好友也緘札相貽過承慰解知己一  
言寵逾華衮平生欣戚相關屈指無幾而別易會難每  
增惘惘前欲借濠梁一席以請教益事雖不果而手示



殷然此情已佩無斃矣聞赴館鉛山舊好居停知客痛  
癢百事可以如志良慰良慰武登傷貧竟至徂沒聞信  
涕霑蓋所痛非一事覆巢風雨險甚羊腸得長兄極力  
護持諸孤屬有天幸若弟綿綿寸心俟之歸日耳其相  
伯季長才久屈頃試必連售千里之外日竚的音便候  
近福百未盡一

復屠展馭

長淮冰雪中辱世兄惠問見及深嘆殷懷古道情見乎  
詞得喪浮雲此中早已參透況一代史才野伏不彰者  
甚多如弟沉淪豈爲淹屈惟諉之時命即浮世自有涼  
暄亦總付聞見之外然非世兄道眼相看何敢以此自

解嘲也聞下帷十畝之間不爲定相晨夕藝圃更多佳  
事犬子過承獎飾種種誨就感不去懷潁丞君與弟輩  
戚雅最篤其清苦梗概已備述之當事第潁去郡遠從  
未晉謁不免牛女尚隔河漢至於來諭自當書紳納整  
引嫌聞問久絕寸心相照而已風便裁布幸恕疎畧

與徐健菴

前過高齋備承款洽惜匆匆返棹未抒奉教之懷耳抵  
舍後即走晤汪晉老知尚書詳解已錄副本從曹民老  
轉呈令弟二先生處其語水所藏衛正叔集解一書亦  
托友人代詢因吳孟老近屢出門未得訪晤遙訂新正  
報命奉到家藏經解數種其儀禮戴記係少時誦習之



書中有妄筆吳園龍氏二傳多殘缺伏惟涵鑒茲專紀  
回舟率勒不盡

與錢武子先生

戊申都下得親杖履壬子黔中從家郵獲闕寄帙流光  
荏苒十有八年九峯三泖時往來於心也頃聞先生寓  
南宮亟思造候緣浪游初返百冗綿結且連年病憊之  
後摒擋藥物未遑鼓棹曾從季弟扇頭見楷書佳什鏡  
水方瞳錦心晚律詩仙耶人瑞耶先生兼之當世豈復  
有兩欣企之懷不能自己謹此先布積悃來月上旬定  
當趨侍吟榻當事論文甚合諒舟旋尚緩庶姪不致有  
後期之悵耳希示為幸

秋錦山房外集卷一終

門下後學金壽彭校



秋錦山房外集卷二

嘉興 李良年 武曾

尺牘二

與顧寧人

客春黔陽一緘奉候想入記室自後驅車關塞不覺踰  
年朔氣愁人每憶江鄉景物恨不能奮飛與先生共話  
鶯黃柳碧間也邇來道體何似肺病想不復作甚念之  
弟新正入都爲諸公所畱遂下司勳之榻屈指邗江繫  
纜又在來春爲耿耿耳所攜台札一一致到阮亭匆匆  
屬筆前貽錫鬯物面致久矣今館於東撫君甚善也好  
風南來時賜遠音以慰翹切



附答簡

顧炎武

黔中數千里所刻之書并十行之牘乃不久而達又  
得手報至方山所而寄我於樓煩鴈門之間若頻陽  
至近天生至密而遠客三楚此時猶未見弟之成書  
也人事之不齊有如此者可爲喟然一歎此書中有  
二條舛誤未得高明駁正輒乃自行簡舉容改後再  
呈且續錄又得六卷未必來者之不勝於今日也交  
城縣刺弟所正之七經誤字附上一紙比客維揚頗  
能攝疾遠承注問並謝

與高謏苑

未歲漫游得依廡下授餐耳誨忘其在客至於論文契  
合更在言表一遠清光好懷都絕研田蕪穢與胥史相  
倡酬真同墜溷之花覺身世可憎萬慮冰釋久無一字  
報長安故人并疎候於知己罪狀何可言濠梁雪夜捧  
惠寄新詞送行便面自念孟六之不才多病弟實兼之  
獨承門下眷注稠疊細把重吟申以咏歎嗣聞榮補不  
禁額手然以謏園素望此定非久處地惟日祝鶯遷如  
臨行執手所期庶長才益有展布耳里句二章久存游  
筭茲錄以請正別後新篇儻有便風公餘垂教如見顏  
色矣

復徐健菴

某曩去都下不及候旌旆而南荏苒三秋自悵德輝之



遠日聞百福營臻慶在寓內開閣孫弘燕閒定少不敢  
輕通候鴈於左右而緘書遠下菰蘆每辱注念追疇昔  
而感知愛寸心時在天際矣某令一事地主以夏末赴  
皖會訊嗣接手諭緣本案已定五馬曾爲秋讞矜疑之  
地預請於鈴閣此矢慎本懷亦藉以仰酬台委彼時某  
隨束省母之裝迄今三月方擬再過濠梁未審秋冊不  
至中變否擇風裁報深愧稽遲伏祈俯鑒倚紙可勝瞻  
企

與汪鈍翁

某自未歲奉別寂處濠壩舍故習而督胥史之事餬口  
下策不足齒於人數以是京華夙好音問久闕春間甫

寄尺一於左右旋聞先生移疾南返畱心史事者謂此  
局未竣惜歐陽鉅手不始終之某應曰獨不聞神龍止  
見首乎蓋繆窺先生微意且嘆二十年來仕宦出處未  
有如先生去就之決者遂不禁額手稱賀也頃從江北  
歸閩亭帆駛時值昏黑失踵候爲懊悵某早衰近復多  
病方欲違辭幕席裹足村野咀菜根以自老惟常過梅  
花書屋請先生近著以畢兩年之願於志足矣家叔明  
遠向訪杖履於山中仰荷知愛茲挈舟再過附候百福  
餘緒非一俟面布不宣

與陳其年

前者潦倒作別流光如駛頓閱三秋長兄領袖石渠縱



覽一代之書手定千秋之業非人間歲月可擬乃聞旗  
亭歌板仍不歎陳翰林新製寂莫健羨固淡馳思日積  
近傳長編已就信史可待菽林想望謂出長兄輩數公  
鉅手班馬陳歐陽而外又屈一指也竹垞南下亟欲面  
詢嘉祉而弟偶滯家園尚失解后適約山家叔入都奉  
候之便附此布意家叔爲健翁先生門下士向曾被逾  
格知愛今負奇而游思爲研田計先生相見時更藉齒  
芬廣其交識一切玉成皆本緇衣之好不獨弟感推分  
矣

與徐勝力

奉辭顏采蟾蜍三十六迴圓矣翹首朔雲離情滿抱取  
值勞傭歲月都非已有長兄方在天際半臂縱橫芸編  
稠疊弟不敢以鴈鯉之音相混定蒙俯鑒比聞史事已  
有成緒出長兄鉅手爲多菽林益增想望頃竹垞南來  
謂得面詢榮祉而弟今秋竟滯里中尚未獲晤茲值家  
叔約山入都其文采奕奕弟蓋以叔爲師者負奇遠遊  
特候簾閣長兄每遇才賢汲汲推引而尤於桑梓加意  
一切定不靳指南耳

與杜肇余

睽隔清光者三載仰銘夙昔摯誼每切溯洄回首秋讀邸  
抄知山公重望暫借爽鳩天下方厭苦兵刑得仁人議  
獄民以不冤太平有道之長其施在閣下矣田間故人



豈勝私頌弟自前春垂翅潦倒去國門時讀寵行大什  
彌媿不克自振以負閣下期許鶴鯉音疎定蒙涵照茲  
值子大兄公車之便荒槭敬候慚企併集

與趙雷文先生

都門奉別清光荏冉三秋每懷疇昔明德時盈寸抱也  
某以濠壩事劇日作勞人久不通候於函丈罪歉無似  
遙知榮履暢臻時望燕雲而增欣躍客歲拜接手翰雖  
某令曲年翁處未通片字而以台諭書紳年來與五馬  
頗稱水乳想俯聞有素矣頃者省母東還從邸抄中得  
悉旌麾視權維揚計日南下不禁額手某緣舍間有不  
獲已事往辭濠席度歲梓里來春或得躬賀行部一侍

色羨於竹西煙月閒也遠道荒槭臨稟可勝悚仄

與吳修齡

愴園聚首教益良多奉別以來音塵間闕祇切夢思遙  
聞杖履佳安日讀人間未見之書名山大業月累歲增  
私心嚮往弟不能家食展轉客濠右盆魚籠鳥目不覩  
偉人無一善狀可報知我惟冀得辦□□爲將來送老  
之計先生必聞而憐且笑也猶記話別之刻辱以敝鄉  
徐氏地理一書見委代覓未嘗敢忘而次老久不相晤  
曾與敝友沈蘅老談及蘅老於斯道畱心有年因鄙人  
口述先生所見高出一世急走玉峯思有所就正想鍼  
芥投合必不秘之言外即先生見委之書蘅老終能得



當以報也某首秋暫歸今又束裝而北倚舟率布不盡  
萬一

復龔蘅圃

去春文讌之樂纔及數刻別來又經朞月七夕女牛三  
秋鴻鴈即每歲一逢相違之日長矣寧無惘然前承牋  
教並誦新詞畧如談聚某閉置斗室車中新婦無此窘  
困解人異書久不接目耳遙憶芸籤綈几健羨之餘且  
不能不妬吾家季氏也兒子援例種種玉成極煩注照  
早已心識高懷頃復得之家函甚悉秋間歸里弭策白  
門當九頓言謝并快索近篇一洗煩襟十斛塵耳馮兄  
此歸束裝在俄頃間附候草草希諒不一

與朱竹垞

使星涖白門識者比於韓歐陽旬日以來士論流布桃  
李新陰率多名彥江左文章盡出爲世楷模非菰蘆中  
人所私頌也戚友聯翩涉江弟初擬里中候晤遂稽馳  
問鷓首將發引領彌切勞人早衰近復多病已決計逞  
辭舊席收拾殘卷或得邂逅於毘陵錫山之間一盡衷  
曲儻舟車相左俟仲冬歸來躬送還朝旌旆矣風便率  
布倚紙倦企

與龔蘅圃

車騎北發後日企好音側聞姓字已徹雲霄雖屈驂駟  
於跬步亦見文章光燄自有真也萊綵南旋江左傳爲



盛事弟淹阻里門未得摳衣祭戟一與稱觴之末僅以  
俚詞附名裝潢媿慙無似竹垞公讌之餘知己倡酬新  
篇定富江山增麗不禁神往未審何時得快誦以開茅  
塞因兼六行率勒布候馳想未宣萬一

復耿孝伯

仲秋接誦大翰遠承注問九頓以銘子晉兄畱濠旬半  
縷述興居先生一代偉望涖節荒疆東南舊識共切慙  
倦比來惠政風行匡時績懋飛芻輓粟之間懽聲四起  
自此公望日隆非三秦所得久私雨露也前閱邸抄馳  
念不置及見全疏知原委已爲中外所鑒薄暄微雲何  
傷朗照論定可早晚埃耳曾於子晉行麓索觀書法蘭  
譜諸幘力適意遠如見古人真面目嘆爲雙絕久矣惜  
道遠無由執縑以請儻公餘揮灑得分一二見貽永爲  
珍秘乃厚幸也從者西邁敬候百福神與牋俱

與譚左羽

年鬢漸增旅懷躑躅平生儔侶半隔關河每憶音顏益  
其神往野人之械不敢輒擾鳴琴前者一通疏問又非  
本懷去秋拜讀答簡兼詢從者嘉祉循聲不禁額手於  
千里外矣頃暫歸里舍晤家表兄丹崖語及吉事業承  
見允定期當在桂候因舟車道遠恐諸有未周託弟致  
聲統祈涵鑒弟與天兄行止束於客作不克竟所事爲  
歉知蒙雅亮耳餘情遙溯



與繆于野

車轍北游久縈微念首夏過吳門晤方伯公於署中猶未知元龍憩上牀也昨又聞移裝郡閣則有定指矣賢仲季遠行伯母倚閣更切帶水家鄉便於內顧此弟曩在濠梁臨岐執手之望若操左券足以慰至性矣雨中斷客小息村齋靜夜書聲冷然過渡詢之則君家玉樹也便因附報冀豁旅懷草草不一

與徐健菴

冬日晴暄來自天際伏審先生簪裾多福某久隔清光寤思明德猶鉢心版時捧誨帖菰蘆中頓有春色昨歲藉公車友人北便手疏敬復諒塵籤几嗣是浮蹤江滸

往還相半用媿鴻疎今且以苦出餘生躋驅再出越禮依人覲焉身世真不堪自述於大君子之側也濠梁五馬向有積懷欲傾布於閣下茲走專函以某夙荷知愛屬一言爲副此中委折無庸局外贅陳汲汲桑榆其誠可鑒先生勿辜此來意即某免辱命之誓矣因風肅布不盡神馳

附答簡

徐乾學

音驛闊絕不知先生遭罹大故未及虔寄生芻奉候孝履負罪何可言弟才具疎庸濫預史局職事填委紛如亂絲每欲邀知己助理卻不敢啓口有搔首延佇而已某公祖向屬契交適承芳楫銘心何量諸容



再布不盡

與顧祈叔

道駕行後日與賢孟氏細數郵程對晴色輒欣然雨雪則悵焉念之昨者急足返知吾兄飲家醇於玉峯之側又旬餘矣久客乍歸一年將盡應亦念吾異鄉孤燭也聞米鹽酬應瑣鉅并集雖長才綜理自能整裕而暇刻定少弟懸懸握手固不敢相期太早俟上元燈火闌珊時候便當引領此亦地主之意也扶衰良藥冀畱念不宣

與查夏重

虎侯過話南還近狀極慰遠思弟跡類羈鴻歲一歸里今方再著征衣僦船詣訊莫遂所欲天末幕府新歷戰場暉鳳就禽之日陳徐記室之年看鼻馬鞍濡毫漬墨豈止杜陵夔後放翁入蜀奉教無由不免色飛心動耳前游十稔犵鳥蠻花都落夢境惟是故人生死顛末曩者流傳不一即戡定以來邸書畧覩終未縷悉友兄見聞必真乞書一紙詳以見示弟雖在客家間能馳寄也至其他記載則俟異時造請耳令弟嶺南之游旋棹何時率布寸懷未竟抒寫

復汪鈍翁

某等於前月十五日始畢襄事日來正擬專人叩領大誌以光泉壤茲荷先生命使賫發跪讀墓門之前感兼



存沒拜德良多何乃又蒙遠唁謹盥手焚芻以志隆誼  
惟是儀文殷摯非分所敢承藉手敬返某等即當馳詣  
堦前泥頽百叩先此肅謝不盡啣結

附來簡

汪琬

別後緣亡妻忌辰不免悲悼遂致染恙有爽前諾勉  
起握管潦草麤率不能闡發顯揚之思乞加塗抹改  
竄庶見知己本擬買舟蒲伏几筵少盡猶子之誼亦  
以病故不任長途遣使奉慰幸賢昆仲格外原諒外  
具菲薄殊媿不誠伏祈叱致坐前并望節哀以彰大  
孝不宣

復徐敬可

前年駕過荒居相左片刻及弟瀕行造訪驟雨尼之榜  
人催發自此音塵曠邈十年離緒展側至今踈闊之讐  
撫衷莫道乃荷長兄記注尺一遠頌久役勞薪頓開沉  
錮矣左兄長才臥治又得良友相助茂宰之花與記室  
篇章定相輝映寶峯石室間豈勝慕羨若弟食力非農  
抱牘非吏名實交違不堪比數加以天阨游子使負米  
孤蹤重罹大故餘生坎壈如此因知己之慰存祇增愴  
歎耳世途風味可見石火升沉令人益思名理側聞易  
學淵源發爲撰述必有瞿何所不逮者起予之望翹首  
俟之撥冗濡豪寸心俱達

與



丙辰之春維揚寓肆執手岐路餘情至今填臆弟近客濠上五年別先生則八年矣前此十年中定交於塞上久聚於國門并維揚暫晤三度懽逢若斷若續尚悲離索今望仙源不四百里蹇驢造訪信次可達若或尼之殊歎依人活計直是廢文左券耳晤子質知就榻仲舉方輯省誌此事久成蕪漉大率催科能吏取裁於一二夤緣熟客庸手儉腹令人噴飯今乃延致先生世間尚知要好誌書耶奇事亦佳事也質老又云州志中載先生入隱逸傳竟力謝不許聞而心折良久弟嘗謂郡縣多科第顯爵不足誇惟其地有孝義隱逸文章數公磊磊碁布便覺山川增高秀之氣此非癖論或有識所歸

也蓬蒿仲蔚谷口子真以況先生寧有媿色第人心日澆非止倖竊爵祿并此名實不朽數事亦思竊而有之橫灾黎棗名魚目以珠而照乘者羞伍焉此或先生力謝之微意乎千秋終有定論退然不居逃名名歸益信先生非今人耳弟顛躓躑躅他非所計年齒漸增學力荒落思之惘然獨此中有不昧處視人世一切依戀如沙蟲野馬是乃別後尺寸進步不敢自欺欺友近不幸罹先慈之變頃已歸畢襄事誓於來年返策米鹽瑣細卸肩婦子伐茅誅荻結廬丙舍之傍彈琴詠歌其中以遣歲時恐自此去先生益遠且久露白葭蒼無從告語輒因風便聊布候音先生別逾一紀傳聞異辭



終未識此老行藏作何究竟平生有知己之言夢中時  
見白髮祈見示爲幸令弟無忝先生雖未謀面夙心所  
依也並乞聲候

附  
答簡

九州雖大然吾輩落落不啻晨星恆爲仰歎憶與老  
長兄追攀上谷憑眺金臺弟獨騎驢將登太華時蒙  
以五言贈別俯仰之間頓爲陳跡邗江邸次復示以  
九友之篇至今不覺又將十年矣弟近鰥處窮谷向  
平婚嫁已畢但衰痼益增孤陋彌甚間一賣畫旅食  
僧寮稍以自給潦倒之狀何能具述也昨歲繆爲江  
寧使君委以志事南中諸同人若瑤星覺岸闇公堅  
不肯使弟藏拙以百年之墜緒蒐羅凡三十餘萬言  
三閱月而就乃辱遠聞垂及他日見之寧不捧腹也  
倉劇中應白洋河之招篝燈草草不次不悉馳溯之  
私可勝寤寐著作想富未識能一沾其賸馥否心祝  
不盡

答徐淮江

荒居率別杯酒不及持罪甚廿日後即同家伯兄買舟  
奉訪值尊體尚未平復自歎緣慳然第五橋邊從今識  
路他日叩雲亭當不使鶯花笑生客也頃歸自武林而  
大札已見頌數日捧函三復感荷良深獨是門下以空  
前絕後之才爲人文聲氣之宗弟何人斯乃承華獎此



則撫衷循分又未免感極生慚矣文道至今日大難始  
密而終疎面交而退有後言更或以耳作目舍真好畫  
毀固無損譽亦未當此風固關時代而吾鄉習氣尤甚  
弟不耐浮沉年來杜門良亦爲此旣已杜門遂并生平  
所最愛極慕如吾顯武者亦幾幾失之豈非恨事今辱  
門下不我遐遺且下文焉某則厚幸特恐時人譏顯武  
爲無識耳置身百世之上著眼六合之內而眞文章眞  
人品始出其他一切皆可不爭此某所有志未逮而顯  
武必以爲然弟知己無多即門下所深許若鶴江孝績  
韜荒子亶諸君弟位以師友之間皆始於落落至今如  
一日也以此知心期可久徵逐肩隨乃爲末跡弟與門  
下彼此相聞二十年今始得合正所以異於流俗未可  
悔定交之晚矣仰報德音忘其戇迂手顫不能楷復統  
邀垂鑒不一

與天生兄

慈仁松下飽佩明德追憶宛然缺焉馳問夢中猶抱媿  
色每念故人裘馬漸滿長安而長兄志切萊衣堅謝祿  
養此種風節眞足廉頑立懦高山安可仰增其神往不  
獨感聚散也比聞伯母太夫人起居百福長兄扶鳩進  
膳之餘發明經史益覺文章可貴何時得寄示一二否  
弟自別來即就濠上之訂本爲負米計不幸去秋奄遭  
大故煢煢苦由自厭餘生頃以地主敦促茹涕再出總



無善狀可爲長兄道也寧人先生下世文游中少一讀書種子思之永嘆適晤王璇伯先生知便音易達掌記率泐附候關河萬里情與俱往

與南溟弟

二十年萍蓬流轉故廬如客家有名士而未接晤言濠署握手恨相見之晚過承謙抑尤佩於中比想駕旋里門方舉襄事某不獲追隨族子之班効執紼之役惟俟歸時拜宿草矣當事家函附到希照入或一致譚方兄殊易達也呵凍率泐爲罪

答小友

弟髮燥時薄有慕尚寢尋至三十無所就牢騷遠行爲遊子爲寓公繼而浮湛簿書間作幕客坐消歲月老將至矣追維始念尚可言哉來詩末章用千里驥相目不覺感而三嘆也淮濠地頑無可語者巾車遠來如空谷足音旬日盤桓雖恨忙中草草而意高腸熱得之矚宇實爲心折遂不禁里語相投瑤瑤儼答已屬厚償獎許過情又使我寒宵面赤矣明當謝教暫復不宣

畲徐崧媵

游蹤自魯而燕友聲日廣天固愛才不使浮湛幕席且下榻古藤書屋竹垞蘅圃並西峻諸同好旦暮論心此樂可忘羈旅聞之不禁色喜也近刻二箋纏綿清麗讀之意豁惜未見全帙耳某髭須如雪作客苦衰爲農恨



晚了無善狀可報臘月承手問知軟紅車馬尚記蓬蒿  
之徑此今日菖蒲花淡我寤歎姑丈神采興會不減曩  
年足寬遠念比聞援例入雍友朋相成之雅風詎可佩  
候鴈南時望好音與俱博堂上歡顏也朱立老過訪竹  
垞先生必與老表弟把晤才賢定文傾蓋契洽諒不俟  
鄙語爲介耳

復劉元歎

春間車騎至郡且聞羣從咸集弟以盆鱗笈羽不獲追  
隨言筴至今有餘悵也鳳誌向係貴地陳兄編輯閱其  
原本如棟宇旣成拙匠無從措手前人有云必收盡海  
內書方可修一郡一邑之書弟嘗歎爲知言今藏書家

旣不輕出而此間又乏坊估數月以來陳兄添入近事  
不過藉二千石符取之州邑譌信相兼此無米之炊弟  
固不敢以冗率之筆浣名邦誌乘是以從不與聞昨拜  
讀尊先公行述追念平生感慕文集即當莊付誌局此  
則斷不敢辭校訂之役也六家詞一部中有鄙製藉手  
呈正德門諸先生珂里諸同好統希聲候不宣

與曹澹餘

憶歲在癸丑載德東還驚飈頓起音塵河漢斷絕七霜  
回思夙昔追隨眷拂摯深緜緜寸心感知己之難時縈  
天末也戊午秋復赴都下與中翰先生晤對共話情曲  
日望瘴雲開朗曾賦鷓鴣篇三章以當左券至今在篋



自後轉客濠梁郡署又經兩載昨閱邸抄先生皎日精誠已徹朝宁三閭之澤畔羈孤屬國之節旄盡落先生所處視古人倍有難者名且蔽於天壤豈止與世共見欣慕交馳恨不能奮飛以侍左右耳順寧劉郡伯由鳳入黔之便荒槭附候劉公粹德冲襟當代無兩相晤時儻有商畧定蒙注照烏道蠻沙荆榛漸啓某落拓無似尚當矯首車轍所嚮或得以餘年杖策傾布平生感激之概倦企萬端與牋俱往

復葉九來

索處濠壖舊游迢遞每與祈老坐對無日不思半繭主人也鷓鯉南來屢承牋問下及推獎逾涯情真語摯一若重嘆其濩落者媿則固浚感且無數年來造物與世遷移以先生才望尚滯邱園如弟斷梗飛花逢挂便住更何足惜付之笑歎而已秋初省母東還匆匆去來遙睇玉峯不能鼓柁惟是縱酒高齋招鶴看梅雖成陳跡而情景宛然可念倚聲一闕錄以請正極知蕪率聊見懷抱耳埜臣兄人文卓絕春間從祈老扇頭讀其擬古詩心折神文久矣惜研田之計尚屬畫餅敬讀手諭中心藏之晤間乞道相思諸另報不一

復徐健菴

記違絳帳江春四改依戀德輝此情無歲時也秋末一槭馳復兼候清安附公車友人行篋計徹典籤□□事



禾金山房外集卷二  
轉致始末諒蒙鑒悉今秋冊旣奉停止惟書紳以俟將來報命耳某郡伯心依模楷每慙疎節

以某曾辱知愛更屬一言代宣皈仰所冀天際春風無遠不拂即載榮施矣禮編更正目錄惜未得見實切嚮往某傭值簿書筆墨荒落顧不自揣量尚思明歲東歸有所撰著其於是編按輯更有難忘者乃願附青雲夙心也惟是家無積書一瓿難以概投而先生方在雲霄無從借窺二酉之藏彌增俵俵耳太史總憲兩先生並冀叱名

復沈方鄴

某自稍知章句以來心傾文采耳習聲名二十年於此

顧半生足跡未嘗一至敬亭山下叩臥龍之宅而請集鳳之書以爲大憾春間晤賢仲氏曾及此意乃荷惠風緘札遠寄濠梁華獎過情琅編儼贈悞墨之餘盥手卒業覺金聲玉質耳目改觀至於恆蹊盡掃如吸仙風於姑射照積雪於峨眉雖經年坐臥正未足領旨趣於萬一也送友拙句了無勝處辱湯子之流傳令人慙負復忝先生繆許或者昌黎雅量片語隻字必收齒頰弟得廁於盧仝劉义雪車月食之列則藉此品題又不勝知己之感矣弟十年來論詩始畧識宋人面目讀梅宛陵集尤無間然即珂里諸賢若愚山先生都門奉教最深耦長阮懷皆得見其人誦其著述先生曾未得握手而



每從選帙諷詠緒言當時便歎爲觀止然此亦海內公  
論非第一人私言也因計聖俞以來且六百年而大  
雅之盛視今猶昔江山秀氣宜其久而益振也某學無  
所成前者逐隊入都不敢望一人推輓夫孫陽之所弗  
顧工師之所弗采敗幹殘羣自分不復齒於菽苑乃先  
生又從而惋惜之後世誰相知定吾文某邀此不虞於  
有道寧敢復爲是嘆耶敬謝敬謝令兄筇公大師雲逝  
彼時某方在遠讀長公三過堂句悽然欲絕秋翁暨馨  
聞念祖家表兄並數月不聞問矣黃觀老未及攜琴便  
爾下世此前歲事也孫愷老來時當致尊意拙刻一部  
并六家詞又小牋數種不皆鄙製附請大教扇頭俚語  
因輔兄歸思頓堅地主投轄而驪駒不待擬製長歌奉  
簡俟之續羽草草布答臨牋神逞

與沈山子

屢歲一歸歸輒匆匆而出如此浮生雖百歲何益況又  
不能乎臨岐苦語何止晨鐘非三十年老友肯及此耶  
世人不願休官林下有識者猶用相譏弟自遠遊來所  
成何名所作何事髮視蒼茫未知所息雖事非獲已有  
可歎者今歲內之約又虛息壤俟再見桃花便是擔簦  
束書藍村相見時也感念注之濶小詞一首可以知弟  
懷抱

答蔣丹崖



半春風雨兼困人事邇日夙疴又見萌芽合眼孤坐而  
已敬誦來篇何殊七發輒於孟氏公復之後率和元韻  
并書博教晚春風日佳時擬邀杖履作塵外之聚小齋  
背市殊不破龐公例也再訂不一

答徐健菴

客歲伏接手書慰唁注存一時并及濯指迴環勒之方  
寸季弟出都時復蒙賜賻菰蘆棘人何以承斯感德固  
浚而媿汗尤不勝拂矣郡齋棲滯初非本懷當年失侶  
孤飛逢林便託不及候軒車而出濠壖劇地幕無晏息  
之賓蒲柳衰微漸侵髮視未嘗不悔始計之左也長安  
在望自分無處著此疎拙乃先生若命以後期矐念雲  
情正不敢視蘆溝馬足爲畏途耳惟是目下未能擺脫  
且傭值簿書之間所趨日異菽圃荒蕪媿見有道來秋  
當返蓬蓽以終母服尋當改策冀副高深便風肅謝並  
布悃縷夙昔在懷可禁企結

答澹園從祖

初手叔祖近集市居多俗懷不敢率讀今日村窗對雨  
焚香老綠中朗吟數過忘此身之在塵埜也帙中丹黃  
已得尚有絕勝句未經硃筆甲出者贅以妄墨殊非卑  
幼之禮宜然商摧千古事承命冒昧諒勿罪耳昨又辱  
俯存失侍悚仄聞山子已歸藍村俟其再出并圖快晤  
不一



與葉九來

年華屢易良會迢然寤歎永懷何能已已春間小札奉  
寄先生方賦鵠原於濟上僅投掌記以俟旋轅諒塵清  
照矣晤從伯得聞動定欣慰移時弟命不猶遭先慈大  
故回憶從前親老饑驅萬悔莫贖茲且以素冠聖室之  
身去住不能自主憂患餘生頓增衰憊未知何所稅駕  
身世如此知己當爲太息也其年長逝殊堪悽悼不識  
旅櫬曾南歸否亦有好友爲收拾遺文否浮名何補增  
人達觀齊物之想可惜此老胸無城府文游中難再得  
耳埜臣兄驚才掞藻弟深所佩服今濠梁地主屬祈兄  
邀致更切同心晨夕之快因向荷手教極爲關切附聞

以報兩日右臂不仁草草布候欲語不能盡寫

附  
答簡

葉奕苞

獻歲三日同徐丈愚谷入山滯雪訪汪鈍翁日及園  
正念先生不置歸接手教稍慰切怛尊堂老伯母之  
變未及致生芻一束猶子之誼闕焉莫申去春迎母  
哭兄往返半載承諭瑤函想浮沉矣此心千里何日  
忘之比聞起居康勝敝友野臣蒙先生加意提挈賜  
之教誨藥籠中或足當佐使耳陳其兄旅櫬遺文總  
無實耗才人命薄往往如斯追念愴園游跡未免心  
惻先生決有輓什能寄示屬和否舍親祈叔感不去  
口惟先生古道十年如一日耳



與爾載

為別數載逝水年華增人感愴抱病掩關馳問疎畧然  
酒闌夢遑時見顏色也高牙大纛中托跡久而益相契  
合固知當路非俗眼而却生才大平仲善文相得愈彰  
矣宅中安善可寬內顧區畫之暇亦稍稍為他日買山  
計乎萬里星沙往來不易暫旋何時可勝遙憶弟素知  
幕中歲月寒暄紙墨徒累人耳因虎老行便草草附候  
幸勿煩作答也

附答簡

錢枋

衰老久客舊雨凋零親知之念轉篤乃別逾五年而  
音問稀闊亦精神頹嬾心跡不相關之驗也每從家  
信囑大兒奉候興起併報閣潭安福以此稍慰懸私  
前接台教知灣內別業已協初謀欣羨不可言但長  
兄既以多費縈懷弟方圖畜數椽之資未能即歸則  
坐對晴窗各言游歷不知何時可遂耳

答尋壑兄

長兄方在調攝二物宜資頤養何乃分餉耶兄惠無卻  
理則悚然之懷勢不可伸此謝不一

與朱竹垞

辛酉之秋旌舫便過里門弟正書驢券而北家釀村蔬  
無由話舊至今以為恨事依人籠鳥展側皆困自遭大  
故益復衰頹敗葉餘生媿報知己鶴鯉久不附於閣下



每慚疎怠乃荷誅章特寄遠賁總惟感此唁存不覺眼  
枯再淚矣千仞之騫音采日上人間未見書如閱家藏  
茅檐老友何年細奉明誨開其弁鄙鏤版大製神山莫  
即夢想如何曩者史館翦蒐下及先集極知良史盛心  
感激無地聞專纂文苑另歸鉅手尚冀齒牙始竟之也  
先母狀誌一冊呈覽惟是墓門片石有藉韓歐而未敢  
率啓今分虎入都造請儻賜第餘閒許爲命筆則母德  
幸甚愚兄弟幸甚夫人至偃蹇凋瘁以貽親羞不敢妄  
倣龍崗故事又無能舉一字三縑之幣此則世所訕駭  
在十兄則必憫而許之者矣遲早惟命肅布區區欲語  
萬端紙盡不及淡人先生所叱名道候尋當專布以誌

曩感

與友

客秋遠辱垂唁又承過訪不獲晤言及拏舟造謝金昆  
方在客泥首之餘仍深歉悵頃暫返鄉閭知俯就貲例  
且當北上從此都下人文斂手避長卿詞賦樓谷紛紛  
直置下牀矣第不識命裝何時緣日內涉江之期已逼  
聞琴烏夜把臂維艱音問久疎不勝悵憶瀕行畱布希  
示嗣音

復查聲山

茅檐寥寂屐齒見存寔然黯然交并一時繫維之不獲  
真令駒從笑人冗中未能奉訪屬兒子走叩過承款洽



兼接手箋中心銘之家兄於別後數日即南行業已面  
致來意今更附數語於舍姪信內又別札二件并上行  
笥希爲點收所懇聯語幸即惠寄鐵限將穿之際以此  
相累正欲借法書爲顏色雖雲山萬里猶能於斗室中  
對故人耳

與友

都下曩游追維如昨風流雲散五載於茲獨南州雅藻  
夢想依然繫馬僧坊聽竹林高詠尚不敢等之陳跡也  
別來疎候福履定佳長兄著述等身逢迎到處自恨勞  
人草草無從仰窺涯涘祇益惘然耳敝同學沈行可兄  
孝友篤性弟之畏友也爲儒數奇師長康之術其聲在

四方而尤著於嶺南近蹤則茗雪居多君家大阮知之  
最深今游武林心儀大雅弟言如羽不敢辭紹介以元  
禮之門品題所出也方今游揚於此道恒加鄭重理固  
宜爾惟見聞所及投以盤根錯節利器乃見推而廣之  
使世知有真盧扁仁人必有取焉若行老胸無點塵古  
道可式長兄晤對間定以弟言爲不謬耳

與友

二十年傾懷大雅坐臥兼之昔歎浮蹤今愁善病視語  
水清漣竟同銀漢每憶先生聲在寓內置身百尺千秋  
盛業自爾日異月新而弟止窺半豹自笑飲河此中馳  
切何可名狀適敝友徐秋田造訪附候近履秋田與門



下已有再世之素自奉教以來紉佩最深茲將遊江楚  
間雖故人綦布尚有問津於有道者文藻如秋田在先  
生自樂爲之指南耳弟眠餐稍振當圖樞晤請益伏枕  
不盡願言

與龔蘅圃

別來五見梅花竟疎尺一總以頻年出爲勞者處即老  
圃研田蕪穢不敢遠塵掌記伏聞名祿日優星車南指  
慰企交深祇益神往朱鳥山川奇麗最宜才子想商歌  
吏愒之餘文酒不廢他日錦囊佳句應與鬱林片石爲  
旋舟雙絕矣舍姪自失怙家居每懷明德前承垂唁倍  
增古道之感茲來嶺表極知仰混清轅所冀先生不靳

提誨加之噓拂一切總銘大誼也冗次布候荒穢主臣

與曾止山

丙春奉教後頓經八載離緒紛如每懷襟度濠梁久客  
偶一還家閭亭垂柳舟無信宿之維坐是屢虛造訪頃  
以季夏六日晤家兄於藩署又邂逅華希老畧悉起居  
梗概知長兄方擬北行而未果也竊謂齊省之案久寄  
吳中遠遊似不若近地適敝鄉道臺耿公路經濠上以  
幕才下詢弟首舉長兄姓字以對道臺鴻猷駿望兼有  
好賢愛士之風折節推誠當代無兩茲過吳門旌旆尚  
作數日畱輒命弟馳聞儻駕在光福得一出晤爲望揮  
暑率布不盡願言



與吳虎文

當時岐路不意冉冉十七年中間解后直如萍聚相思之苦如何可言昨歲聞長兄已賦倦遊鍵戶著書頃歸里門思有所請而征裝又西邁矣此豈尚營買山之計當是籌世偉畧不能謝江干車馬耳珍鳳歲蕤浮湛幕下如弟羽毛凡劣生事可知或亦時厯故人垂記也濠梁晨夕竟無同調私心所願惟在左右而地主亦耳熟聲采託爲致意際此各天無由自達如何如何儻機事適有湊合之時幸以動定相聞萬一巾駕偶旋便過敝里一呼小兒接待顏誨俾悉弟所欲言尤爲厚幸矣適理江檝倚舷率布不勝候命之切

秋錦山房外集卷二終

門下後學金德輿校字



秋錦山房外集卷三

嘉興 李良年 武曾

尺牘三

答錢子湘先生

浪游日久自歎無成每舉念鄉閭未嘗不夢涉半完而親先生之杖屨也昨者賦歸得拜手書三李長歌剩舫斷句先生惓惓品目加之濩落之人終始不渝如此迴環至再感耶媿耶某何能言唯不能言感且媿為極深耳第恨連年作客蒲柳早衰今雖堅謝遠遊止堪與藥物為侶儻掩關自攝稍能振健尚欲從事殘編和酬白雪并圖奉邀詩艇恣往還於鷗鄉漁舍間耳紙墨不莊



統祈矜恕

與徐秋田

古人相思輒命駕千里衡宇相望菜根訂聚忽作客氣  
語得毋稍染鶯橋風氣耶萬勿固拒午間掃徑俟矣圖  
章拜諾感且不朽奉到六石擬式各異意欲稍掩其貧  
此如村廚竊五侯鯖藉以擺門面也幸毋噴飯

答東梧

前者使旋弟值微疴初愈手顫不能搦管有失裁謝乃  
疊荷隆情之後有加無已埜芹見外珍味復頌腹鼓而  
顏甲弟實兼之頌何極也

答周管谷

遠荷長兄記注寄以手書又某詳陳動定知問字索詩  
實繇車轍一時都下嘆名下無虛種種夢想於焉大慰  
來札惓惓以舊林爲念軟塵中不因人熱道心應爾然  
草堂之貲莫辦向平之累尚存正宜乘此精力未衰一  
切營之筆耒請以三歲爲期方敢與吾兄商畧耦耕耳  
弟本病餘而內人久嬰痼疾弱子侍湯藥亦屢致困頓  
自春徂夏左枝右梧生趣幾絕今弟於旬間右手忽患  
麻痺竟不能舉筆想天欲令斷絕文字緣耳此不足惜  
而年止半百漸成廢人將來豈復能辦生計乎知己當  
爲太息也

附來簡

周 篋



別後兩接佳訊弟亦一奉候言彼此之情同於披面也新居落成足以擁書南面抽繹研思辨析奧義王充之論衡劉晝之新論不足多也弟暮年牽掣驅役風埃故態未忘豈能諧世亟欲圖歸勢有不可息肩娛老之計非所敢望但以初出門時親友祖餞甚衆空囊羞澀何以辦歸裝乎屠羊之肆故在老僧尚可爲也人生幻脆取譬露漚卦氣已盡之年復何所望賢昆仲曠識雅抱息蔭浚居人皆以爲吾兄抱負未展尚當一出弟意不然人苟明於理則富貴貧賤同歸一致許巢夔契各遂所偶豈有定計哉不識吾兄以弟言爲然否長安覓館殊不易奈來者不絕殆亦

狼狽者多矣聞之當一笑耶

與徐果亭

曩者憺園棲集得奉大誨並渥殷懷銘心如昨日事先生暫娛綠野蒼生望切遠邇繫之弟浪游計拙客夏負疾還里菰蘆掩跡每擬拏舟樞謁一親道德之坐竟爾逡巡俯慚自遠茲荷雲緘下及捧讀諭指自當趨命恐後以副令兄先生吹椽拂爨之盛心惟是早衰蒲柳百疾互嬰近復右臂不仁漸妨舉筆濡遲歲月有惴惴不能自定者然回憶德門品目寧敢忘諸侯賤體稍堪行役願作他時不速之客此皈依夙志也不宣

附來簡

徐秉義



自別紫宇忽忽數載向日追隨京華備聆教誨每思  
良會不禁神馳先生閉戶家居著書論學太邱之里  
光映德星鄭公之鄉香生帶草欣仰何可言喻弟時  
欲扁舟奉訪一接清輝兼寫契闊而疾疹時作未能  
出門深懷歉耿昨家兄書來渴想高賢意欲延至都  
門晨夕就教命弟奉書布懃儻蒙先生不棄感不可  
量先此陳奏另日更欲到雲亭面請也另楮不盡翹  
切

答拙公

昨接手示弟心口相語曰此兵家以退爲進將出吾不  
備抑子房之修棧道耶舫齋夜坐再疊六章聊固吾圉  
耳故不復作贈答語刻下歸自東村而樵李之報儼然  
臨之北軍飛渡何神速至此解甲嚮風姑輸宿飽之糧  
犒公筆陣尚當肅聽凱歌露布也步伐稍有雷同亦兩  
軍未相見故耳不足爲大局玷公以爲何如眼黑草草

與汪鈍翁

客秋清話又見柳條青矣馳想行窩夢魂飛越先生比  
來眠食定益佳健追隨杖履何日忘之朱立老久邀青  
眼今訪竹垞北上曳裾彈鋏非其所好惟是尊先君子  
葆先生一二聲契猶在都門意圖摳謁欲得先生片言  
爲重一致東海此外則惟先生命之祇冀諸公推分獎  
掖無他相瀆儻荷俯俞某之載德與身受等也肅布不



盡

與徐立齋

仲秋肅叩適先生鷓首涉江未奉顏誨悵惘無已榮祉日綏每增欣企荷令兄先生垂注盛懷某前已緬述鄙悃於令姪四世兄之前并先有寸函附寄都下今始捧前書再承殷命何敢遲徊自罹妨諠之讐祇以沉疴劇發歲有定期儻春夏安然始堪遠役此中未能自必故不敢率承遠惠耳心銘知己何日忘之力疾未申百一

與錢爾載

屈指分襟以後藉郵牋當晤語忽春王七度矣遙知新祉百福但悵同心天各不及東風歲歲相逢耳茲值二難連翩省侍似長兄可暫爾卸肩一問三徑如其未能則合并何時殊念念也里中二老相繼凋謝而方伯先生臨行灑灑倚聲代偈儒佛間不易覲此翁也長兄冰玉摯懷必有累欵不釋者矣雨雪杜門硯冰未判呵指布候

又

南發後日望音函以杼寸抱至歲闌始獲所願猶覺手教未詳特走尋壑乃得款曲良慰良慰故鄉奇荒農情如虎千畝之家租不滿百人事蕭瑟日甚客計雖未定準出門固勝杜門矣臘候過暄衆花齊放增離索之慨適其相來告別入楚舟已在門草草捉筆布候不宣



附答簡

錢枋

上年八九月間連接兩緘詞意纏綿情事詳盡恍如  
覲面各極其致山谷刀筆豈能過之迴環捧讀感慰  
深矣以湘兩兄在此平安濟陽旣敦宗譜吳興方爲  
授經各寄館資稍寬內顧知長兄存念枌榆爲之快  
然也弟前薄置南畝方思畧積修脯歸還舊負而忽  
遭奇荒爲數十年所僅見租入絕無食指旣罄仍須  
豫支以給薪粟即欲息影南村飽飯無事隨意行坐  
亦不可得若長兄不朽之業早已著就固不因堂構  
之勞而損其清思何言之謙邪茲令施德暫回肅此  
候安併致令郎是望冗次不備

與周林於

客從燕中來述吾兄酬應世務良苦士挾策而游有請  
於兄必瘁心力應之嗟乎世固多貴人得如林於者十  
數公綦布寓內聞疾呼望仁之歎旣不可得而林於乃  
以貧士肩斯弘願吾知其難人或不盡知也五年離隔  
無片紙相寄旣慮作答爲煩且索致者不必深文定有  
所瀆輒復謝去此老友仰體之私疎問至今想蒙鑒悉  
弟早衰多病漸入膏肓比來小結蓬茅一卷楞嚴坐消  
清晝舍此了無近狀可報故人矣家叔人鑑述曩游載  
誼之深並道吾兄篤念舊雨如弟迂疎最承記注此情  
山重勒之心版家叔再賦北征事非獲已九陌塵中痛



癢關切屈指不能二三凡有就商尚冀吾兄始終維掖  
之耳灑岳曾有勝地否青兄魯望游履定適門才極盛  
一時旅聚尤難覺二陸三張有愧色矣眼暗頗艱作字  
並希叱致不宣

與周青士

早春人傳吾兄於歲底達長安所主方特築新齋以安  
客席即此知緇衣好篤不僅為穆生設醴足慰企懷矣  
弟自別後病憊益深殊難振策既與世疎同心又多遠  
道長此離羣無可告語直如萬山絕頂一孤僧耳適與  
公暨桐川沈蒼老枉山齋云將偕舟北上到時急候吾  
兄蓋與公乃西溪嗣法素挹道風而蒼老久擅詩樓亦

曾親芝采極心折吾簞谷為文章宗匠宜兩公之殷殷  
不置也軟紅冠蓋不敢以羽舌為介重玷二賢簞谷才  
名正為時重交游中雅尚支許延攬文藻定自不乏統  
冀指南俾客子無寂寂之嘆豈止身被者拜德而已竹  
垞兄處因首春同人兩索寄緘不欲取煩掌記并懇吾  
兄鼎致先容得推西溪曩誼是所禱切耳率勒未宣萬

與朱人遠

縛柴村僻視海昌竟日路杳如天際不自知奉別左右  
忽忽遂三年也長兄當代宗工又極天倫之樂三世風  
雅遠邇嘖嘖爭傳向東引睇神夢俱飛弟年來寡儔以



禾金山房外集卷三  
書遮眼絕無見聞適武原嚴示恭兄惠訪如自天降示  
兄人文嘆不可及而餘技擅場法書鐵筆之外尤工墨  
竹想長兄亦聞之舊矣茲遊貴邑敬爲先容愛才斷出  
才藪長兄之門名士所歸也其必有提倡一方爲遊子  
增色者不俟弟言疊疊便風率候不盡依馳

答鮑聲來

一著征衫遂至衰白秋來始獲里居靜憶曩年知舊如  
先生者尤切夢想茲接手音重以令親枉顧悉動定佳  
安足慰十霜離緒矣再覲尊影快同晤對附題草草愧  
不成句聊以副來命耳東湖西水僅隔兩舍異時學圃  
餘暇尚圖造訪彼此作塵外往還先生亦有意乎率復

未盡一一

與竹垞

田家瓦盆久不共此風味矣敢訂竟日之談另柬不莊  
祈勿外爲幸

復宋牧仲

某抱拙村野逡巡忽復經年雖念切摳衣俯慚自遠每  
荷清光下注益其瞻企之懷大照久當專上緣半春風  
雨慮捧人誤浣絨囊茲藉確使附返對天人松柏之姿  
仰贊幾同蠡測敬識數語請正詞調淺蕪不勝惶悚之  
至

與某



秋爽漸佳如對丰采無日不馳思也弟自接教後適多  
悶事八九月間怔忡大劇一切不能措意研塵亦復盈  
寸致稽台委最後手書值過遠村并疎作答罪堪擢髮  
矣長兄知我或鑒其非飾耳旬日來稍就筆墨用抒服  
膺之素彌慚拙劣無當大雅想剗已將竣事不敢自  
匿□□□到印刷後定見紙貴顛望頒示敝里有聞聲  
相慕者多賜一二冊尤感

富高江村

某夙銘摯誼在塵情之外浮蹤不定違左右者荏冉十  
有四秋俯慙自遠頃肅拜恭人總帳過承謙抑獲覲芝  
顏伏見先生篤伉儷之重神傷正切未敢少陳積愆尚

圖奉教於他日乃遠辱寵問特頒大集兼以雅贖自此  
焚香盥指日旣名園珍味而誦天上之瑤華平生欣幸  
於斯而極嚮風遙謝不禁感悚互集矣歸田鉅製非蕪  
詞所宜妄浣簡端荷先生諄命下及當識小跋以附青  
雲此則皈仰夙心也冊卷並畱俟莊對細把之餘敬題  
請正從竹垞先生處奉返諸容造頌不盡瞻馳

附答簡

高士奇

小力回得手示甚慰瞻企秋氣疎清黃花可把祇弟  
襟抱悲涼閉戶作枯禪無一善狀已賦悼亡百餘首  
刺下又集唐數十首尚容正請先生教益道祉定佳  
特此佈候所祈大序及題冊卷便中付下兼乞尊毫



不盡

與王星紉

有一遠僧字我如者弟今日爲之設伊蒲饌擬借雲亭  
奈苦雨不便竟須枉駕度故人必以相聚之難惠然而  
來也

答周林於

道駕西行方有室遠之嘆重以愁霖更覺書齋在天際  
矣捧讀大集乃在長夏鴉塗已久承命奉歸恨無副本  
長畱几案間也堂名是鄭重事弟平生於此最拙需兄  
自取一二弟爲代擇或可參末議耳東陽君所託畱意  
終始妥否月內得一定局庶了此案也不宣

與友

韶景移人遠懷新社隴頭驛使忽拜傳柑即當製以辛  
醪飲茲醇德不使洞庭春色專美當年也

答友

吳趨片刻奉教殊悵匆匆返舍後遽爾抱病適蒙問紙  
見頌並接大序時方伏枕呻吟勺水屏絕謹披衣盥指  
捧讀再三霍然者良久顧以候蟲時鳥之音過辱先生  
獎借欣幸固深實增內媿知先生北旆將發冀得挈舟  
造別以謝不料痼疾纏綿逾月近始託芘無恙而筋力  
委頓未遂摳送之懷并稽馳報罪戾何以自逭小詩一  
首出之藥物枯腸詎可仰塵法眼聊代折柳耳惟大雅



教之并覆其拙是幸儻榮發之前便道經由敝里當掃石以俟蓬門三徑有長者車轍亦佳話也

答高江村

頻歲家居幸覲清光咫尺林園多暇問奇請益乃千載一時也緣經年善病有懷輒阻自慚疎戾顧此農圃支離之概獨不見棄於有道遠承記注欣感彌日弟方謝遣家累借園郡郭致稽裁謝敬誦倚聲奄有二宋集唐悽惋所謂哀而不傷永垂伉儷之則並須三復猶未敢輕置一詞也太夫人大慶昨歸晤竹垞始悉不獲預捧觴之末悚惶無地茲布芹衷深媿樸陋俟賤體少平即圖躬叩兼有所正也年來屢拜名編璀璨几案更欲請歸田集書畫錄以資儉腹先生能各賜一冊慰其積願否臨箋翹企之至

與王令貽

頃者寓樓再聚適塵累并沓一身兼顧至不能三宿自念平生畏熱就涼即仕路文知羣趨則避衆散則否今去住匆匆未副主者倦切極難爲懷先生急師友之急風誼無兩補天填海心力枯矣未審別來情景如何前呈小序不料雙魚淹阻今仍附便相寄譎陋不文無當於鉅美甫脫橐而汗流竟趾矣至鄙集都不足存子姪輩強之削棗故乞大序爲重忽憶曩在都下見市黃鶴山樵畫其畫真也襲以敝褐又有市營邱畫襲之古錦



其古錦眞也畫則贗也無何並得善價以去是後之收藏家不免爲襲所惑矣今弟以敝褐博先生古錦實與此類前荷首俞有厚幸焉儻歲內頒發嗣當肅謝涼秋執手處或當仍聽寒山夜半鐘也

答劉幼功

丙春奉教如覩泰華嶙峋大江深廣浮生無所復恨更辱手書遠到頂禮大篇感慚并集先生嘉與盛心引人千里外矣櫻熟酒香寵筵如昨不意考功先生遂成長別再誦哀章神菟悽斷從此便覺宇宙寥寥不止先生有在原之痛也

與查聲山

舫經梅里適滯省未邀清覲賢書放後聞信踴躍其被落者例多牢騷若不滿於主司獨指屈芳名羣嘆爲名下無虛翻然引命自安於此見科第非能重人人足重科第因知己信之矣公車北發想有定期擬偕虎侯南來把晤緣痔患作楚跬步未勝祖帳駢連獨無墊人之跡冀諒其衰病頽然猶昔耳另單展意藉虎侯以達折柳爲贈鞭不堪博大雅一哂也小兒稽郡此番闕候俟之續走倚毫欣溯

畚徐崧媵

蓬蒿掩跡一切忘情惟天涯戚好未嘗稍釋念客冬訊近狀於蘅圃慰甚比傳下謾苑先生榻此僕曩年在客



如家樂而忘歸處也足下可謂得所主矣里巷才華空  
羣遠駕垂竿長水止僕塊然一病夫耳然水清無魚樂  
饑不易再循舊轍遲暮如何因風率布不一

與呂山瀏

宋詩傑出者其於杜韓諸家入而能出後來學唐只從  
門外望見既不知唐又安知宋昨聞先生高論不覺心  
折宋人讀書多一語更爲確見大篇連日細誦尚覺旨  
趣未盡專伾馳返謹謝教不一

又

大作於蘇楊歐梅無一不收卻無隻語經人道過訐老  
鼎立蘇揚之間宜先生亟相推許望風心折何可言喻  
刻帙一一藏弄拜教實多惜歛游草無副本未敢併畱  
耳屬有較訂之課小跋殊不成語聊用塞命扇頭拙句  
并博笑

復錢魚山

僕平居在雅俗之間治生於家讀書靜坐於別業辱大  
集見寄焚香細把此別業中事比有三山之行冒暑束  
裝意緒可知承委序言稽後至今以未到別業故也望  
日解纜始覺胸中無一事倚舷脫橐用以塞命重玷來  
美他日洛陽紙價惟此二頁宜少減之庶贖吾媿色耳  
見贈詩詞少展後期奉會恕江淹才盡可也一笑原帙  
附歸不盡



富錢爾載

去秋接睽念之札慰懷不淺自爾候鴈南翔嗣音久闕  
緣聞連年楚幕武襄下上長兄方籌輓策荒焦勞簡至  
不敢以寸箋遠混時時從凝祉堂中一申候問頃又持  
歸再誦手翰稔悉佳安衰年久別真喜同把臂矣弟心  
思精力在諸同好中最高為拙薄杜門固由於自量亦欲  
以餘年坐臥殘編少尋要領不料新壘麤完舊巢頓圯  
竹頭木屑又歷冬春邇復故鄉奇旱農情不古將來村  
市間恐不獨無年之嘆坐是冷淡生活初心莫遂荷長  
兄獎注正以未克仰承為媿耳毅菴長逝可痛長兄篤  
念親舊令人添一回悽愴弟離羣索處意緒殊劣幸竹  
垞暫謝城居得過從如往日然比少壯身閒興健則固  
逕庭矣因丁以老行便草草布候致辭戚好不覺冗長  
想勿為瀆

與邵子湘

自到山樓未見湖光開蔚藍也對之神氣不爽昨承命  
使聞先生眠食小異想亦坐此朝來得還昔否片雲殊  
黑不克走晤布候不一

與查聲山

飽看法書名畫繼以青州從事雨窗佳話嘆未曾有至  
體兄不為俗子落墨乃鄙人得之傾蓋此感更深也當  
湖返棹借閱唐宋集數家合語頗不易僅取輞川詩秋



和錦山房夕集卷三  
原人外間之句布置可悉聽大手漁樵面目自與邱壑  
間稱此幅是寫照正復不必作寫照觀只如畫山水偶  
著一人不離不即可耳幸致商之

答友

某壯歲出門寢尋至老升沈閱盡遂堅農圃之志自乙  
丑始營小築未及竟事饑驅又復數年昨再添茅把以  
移妻子比之蛛網吐嗟蠶絲竟月其遲鈍不啻什百大  
可笑嘆以此家居冗□緬懷動定馳問闕焉兼種種疎  
節抱疚滋深前山兄枉駕畧悉近祉託致積想茲荷手  
札遠存寵以吟贈撫今念昔辱記注之惓惓感難言喻  
塵緣莫遣即帶水往還不易寧當長此離隔儻藉臯比

在左近庶得晨夕奉誨惟是江湖日下迴非曩昔視新  
例爲捷徑視四子書爲可廢此雖一時風氣而井蛙之  
見至梅里而極矣承諭謹書紳以俟之拙句敬贅扇頭  
久病手顫率爾塗鴉可勝悚仄冀削正是禱何時杖履  
經游竚臨蓬戶當翦蔬瀹茗以冷淡歡場博竟日塵話  
病餘草草幸宥

復宋牧仲

客歲得親榘誨樂過千春此後荒村掩跡不覺又過花  
時積想盈盈猶在碧油幢側也遠承注問並拜新刻盥  
手迴環瓊光溢於几案乃俚辭亦附塵黎棗欣媿交并  
矣大軸畱俟敬觀此非陋墨所宜輕澆旣蒙下及未敢



以拙辭容專馳奉返使權亟旋先此謝覆可勝瞻企

與高叟苑

南歸判別七謝桃花鶻鯉紛如僅一通棧素不敢以衰  
嬾頽唐之概沱聞掌記敬誦曩篇時飲明德而已昨北  
書他及辱訊陳人感極而慚益其疎戾先生策名清時  
起衰嶺表柳州石湖以後風流再被茲土山川滿篋定  
過蜀游何無錄本見貽此情殊耿耿也彼時使車南下  
弟方滯跡秣陵勝聚寡緣青溪笑客屬有倚聲即今所  
錄寄者音趣弁蕪聊見懷抱耳敝友陸子端轂著聲菽  
圃自習黃農書屢起沉疴遂以風雅爲餘技今負奇北  
游念斯事雖如桃李之蹊然長安倉扁林立而端轂惟  
恃本領不飾裘馬葉龍齊瑟非藉揄揚其能使兒女子  
盡知韓伯休耶冀先生推分而留意焉弟自去春痰症  
歸里至今腕粟視昏慨焉身世皈命團蒲追憶前游杳  
如夢寐未審餘年尚能奉鞭弭於左右否耳病餘惘惘  
紙不盡懷

與柯寓匏

記隨入洛之車九秋轉眼會難別易室邇人遐每溯曩  
游夢中時見顏色也清禧偉撰增寓內想望往來知舊  
能言慰懷不淺弟昔類勞援今同病馬自里文雲散後  
息心禪版惟與塵外拙公閒吟互畚坐消衰鬢而已拙  
公以禪林梁棟游藝詩詞挹宿海而傾之不可蠡測向



與管谷諸同人倡訓最夥未審曾稱之門下否今值好  
秋駕言近地將飽看霜楓益其吟橐且訪當代諸作手  
魏水才賢鼎盛長兄尤其夙念也支許美談領袖而推  
廣焉不能舍有道之門而他屬矣令兄先生爲別亦久  
茲聞遠適未敢另啓羣從篇章菽林膾炙并致神交之  
切冗次草草罪甚

與鮑聲來

弄珠秋水每懷襟度側聞長兄游處相半錦囊名製與  
草庭書帶富有日新不禁健羨弟昔困饑驅今則衰病  
雖嚮往殊切曩時奉寄倚聲白蘋風起之約至今未踐  
眞鹿鹿中恨事也方外拙公禪林梗梓其詩篇軼靈皎  
潛勤而上向自吳中移錫敝里吟社諸同人推爲畏友  
茲薄游雲水並載詩筒訪諸作手吾兄今之陶許握手  
倡和必有羣賢繼踵續虎溪盛事爲菽圃美談者弟不  
勝翹首遙俟輒附鄙語以當紹介惟畱意焉冗次率泐  
可勝神馳

與陸義山

己歲長安奉教領益最深判袂而南天際清光猶徹野  
人寤想邇聞駕畱里第某緣抱病經年百事疎闕未遑  
樞候不審先生何日整還朝之旆彌增馳企耳敝里拙  
公禪宿久暢宗風兼以詞章作佛事杭標雲畫品目藉  
甚屢爲瓢笠游茲樣棹當湖謂先生之門乃退之子瞻



之門不可不一親大雅用敢不揣介以鄙辭屈指近年  
方外聲高菽圃如羅浮翁山吾郡初地拙公可與鼎立  
先生斯道水鏡覽其撰著或不哂爲謾語儻以起居清  
暇推引宗雷倡訓佳日亦 右文之代一則盛事也先  
生其有意乎冗間肅布臨紙翹切

與譚護城

日從里門延佇錦旋嗣聞嚴程徑北末由清覲祗切馳  
思日下循賢連茹丰采文章寧有更出長兄右者海內  
知交正人引領以祝不獨菰蘆舊雨然矣某因抱病久  
春間仰違盛心頃又不克應東海之招然菜根尚無勦  
地儻一兩年內藉芘麤安猶得以饑驅之便趨侍顏誨  
耳咸老品誼才華長兄羅致之真快事也率泐附候抃  
賀之誠未將寸縷爲媿

附  
來簡

譚  
瑄

弟署中無筆墨之友可以相助其尋常者固不當意  
而勝於弟者又不可致老吏儒生俱以一身兼之較  
作幕時更爲勞苦今雖有脫離之機而文章政事多  
所缺畧恐爲知己所羞故亟望吾兄命駕真不啻望  
歲也吾兄言語妙天下不爲木天中人而以子璋筆  
札爲玳瑁之裝實爲屈節況弟身處塵俗而妄冀惠  
顧實見其不知量但聞吾兄即欲入都不妨暫來此  
地爲偕行之計況弟雖學識鄙鄙尚可教誨而秋闈



秋錦山房外集卷三  
六  
應試弟或可爲北道主人故敢冒昧相邀幸吾兄再  
爲熟籌儻以弟言爲然不吐棄之則惠然肯來亦未  
遲也外附些微因在道義之文不敢客氣耳

與徐健菴

先生以渥眷得請書局自隨此司馬公居洛盛事於今  
再覲簡策美談見聞傳播某適返衡茅春來緩束闔裝  
實思造晤茲旋旌未抵里第而萍踪復有所迫睇仰德  
輝馳哀倍切迴憶十載之間繆荷繩收屢邀記注乃勞  
生未遂本懷有辜採擇至意跡慚自棄彌增知己之感  
昨夏重兄還里具傳雅念不遺固陋寤寐中益堅此一  
瓣香矣螺江風土易於致疾倦翮歸飛不遠儻得置身

萬卷之傍有可承大誨者固惟所命委折不敢瀆陳已  
詳致夏重兄希賜鑒照

畲徐淮江

弟以樗材潦倒羈旅謀生長鋏數奇鬢絲俱白遂於去  
春病後決計歸來冀眠餐稍健追尋二三同好共話心  
期若友兄先生素引鄙人於文末別久會稀相思累歲  
重以先慈喪次遠蒙垂弔彼時愚兄弟越禮饑驅負疚  
滋大肅叩宐先顧至今病態支離尚稽泥首眞擢髮不  
足罄茲罪戾自分爲才賢棄斥久矣乃友兄不見督之  
且厚存之特賜手書濫邀溢獎增其恥汗佩此雲情竊  
歎嚶鳴素願何意衰年得之門下也文人相輕古道如



士友兄詞章風藻俯視一切而獨於文游中力持金石  
寧簡無浮聞者心折今疎拙如弟尚荷惓惓記注阮公  
青眼加諸落莫之人弟雖不偶於世殊自幸其不孤矣  
比來藥物麤有驗益尋醫茗上歸即力疾叩頌曩諒不  
敢再逾鶯老綠濃之候弟託跡農鄉八口仍棲闌閭閱  
過眼之雲煙覺來日之苦短廢書兀坐心跡漸清往還  
惟一二鄰翁埜袖相對忘機都無禮法此頽然自放之  
概時俗所笑或見原於識者乘興還來看藥欄友兄果  
有意乎弟當續蓬門籬徑之句矣倚聲一調聊布微悰  
但不堪澆姜史作家之睫耳

富高叟苑

一判襟期十霜如駛某雖索處茅檐不復問世上榮枯  
而獨於先生之登進實切翹首曩年奉別有努力濟時  
之句寸心猶昔頃聞青瑣除音移時雀躍正欲繕函聲  
賀復接手書眷注纏綿仰銘摯誼再捧大集清宵擊節  
漏盡不能就枕蓋幾於聞韶忘味若淮上見懷佳律知  
已情深感慚相并迴環不止在聲韻矣敝同學查子名  
昇者願親模楷已歷歲年向客國門值星輅方指珠江  
未遂摳衣以爲憾事與公子槎客曾聯縞紵茲公車北  
上首謁從者乃夙念也聲山王謝睂目世久嘆驚才而  
實有國士之抱長安舊遊地獨汲汲以百尺樓爲觀止  
慕尚可見先生甄量人物徹於止水鍼芥定非等閒一



切統祈筏引薰沐所加載德豈惟受者至弟追隨顏誨  
年來益深夢想況承嘉問緣多病之餘眼霧心悸動牽  
藥裏去住之計俟來正再報知己此心已不禁飛越矣

與朱竹垞

弟半生勞役痼疾隨之偃蹇還家幾無生趣久不奉音  
書於左右非云自遠良有由也嫂夫人南返里中傳播  
動定因亦稔聞嘗嘆古人負震世才雖見知明主終不  
免與時齟齬往往而然竹垞先生所遭毋乃類是不如  
是何以成竹垞否則一歲九遷白首榮達舉世矜之不  
可以炫識者又何解也盛名去畱較碌碌者為難淹滯  
長安義同出晝又非田間較雨量晴之見所能仰測耳  
弟貧艱家食病畏遠游髮視蒼茫研田蕪穢間有候蟲  
時鳥之音思寄正吾兄並夙好諸先生比來腕顫未能  
繕寫兼闕徧候見時統冀叱名合并匪易執手何時因  
便率勒不勝悵結

答江村

前日拜領大集澄心細誦如涉雲海而望仙山畧識津  
涯游泳其間不能去也辱委題撰種種不敢以拙辭其  
間譎陋實慚大雅前以村居有不靜之事往返茗南未  
得馳上手示再頒昨宵歸讀不勝悚仄茲專人一一奉  
繳附以扇箋拙句乞俯賜教定冰霜始屈想見神傷伏  
惟用達自遣某別有就正未敢藉便春明造候不盡所



陳

與查聲山

春日河干未竟欲語嗣以司寇公之訂不可固謝勉赴東峯坐間時話羊采馳思並切初謂彼中邱壑銷夏頗宜不意止水揚波閭亭往返動靜半之益增衰倦決意於中元前返里而輿從已去南湖良晤難尋悵然彌日聞酬應劬午秋暑正嚴伏惟葆攝昨衡峯來商及江夏一席據云有說項於□□者極荷畱神許之獎借渠甚感刺且云曾造謁於寓齋則已邀冰鑒矣衡峯雖未遠游緣其尊先人老於幕務薰習有素原不僅以制菽見長弟所知也因屬贅一語江夏君南旋在即冀賜鼎呂焉或機事未浹便中乞示知弟藉以轉復幸甚諸另布未宣

附答簡

查昇

中元歸家臥病旬日今已強起即有秦溪之行尚未能叩謁函丈可勝悚仄東海大矣不風而波世事可畏一至於此昇最關情無能爲役可歎也比想夫子暨師母起居萬安世兄閉戶靜修知息游堂中更多天倫之樂直是神仙境界矣遙羨沈門兄向屬舊交淡所器重極欲一爲之地其如江夏幕中俱延在都戚友同登黃鶴之樓不復再經硤水無由說項奈何奈何敢祈老師鼎致并代述不安俟有機緣再圖報



命也此稟

與友

大作以經文緯武胸中具懸河粲花之辯用之行間可磨盾鼻草露布入而華國亦五鳳樓手也心折之餘贅以瞽詞有污篇尾罪甚罪甚昨野味酸寒獲聞緒論既幸且媿朝來乃荷銜紙見及雖藉手敬璧重增惶汗矣駕行何日乞豫示之尚有臨岐語也

與友

吳中拜別寒暑再更衰憊家居此心日切左右去歲兩修候紙慮鱗羽不諳通達最後一紙從耿敏老處轉上未審得徹掌記否自黃門南返稍悉好音再晤長公益知氛翳盡消空青復睹於此信天道有徵然迴思六月之霜再沐九重之露悲喜循環匪言可喻伏念古來賢傑重遭奇厄而其後乃益振先生身關運會畱此百鍊鋼爲異時勳業之地幸毋悒鬱某雖暮齒猶拭目以俟也不宣

與友

白門聚首二十四春矣曩者先生游踪遍天下不圖話別以來足不踰嶺弟間關南朔羅浮之緣獨淺音塵隔絕但悔當年少壯相逢作等閒看也木文歸細述近履將母著書是第一流本色聞詩外文外已剗者盈數尺惜無從問業僅得借觀新語弟雖未踏嶺表坐臥山川



花鳥中樂過千春矣舍姪昌後字辛占自舉亡弟分虎  
襄事之後不能家食訪舊海關便道摳衣造訪惟先生  
進而誨之儻惠念故人一出大集棗黎命納紙刷印以  
歸俾吳越間流傳知所嚮慕此菡苑之幸非區區之私  
也平昔文游零落殆盡霜顛無賴方課結茅爲杜門計  
不遑縷布衷曲草草爲罪

與徐敬可

暮春垂過荒齋不獲少畱至今耿耿初擬立夏前到郡  
便得良晤適小兒病目頗劇而爨僕繼之坐是久滯園  
丁語雖小說固未失實旬內則又抱疴息殮伏枕自念  
萬緣拋卻僅博一靜坐而天若多方斬之殊不可解也  
荷長兄記注感刻何已然鄙意終欲至園中避暑書卷  
亦未攜歸尚得與知己科頭松竹之下銷此夏日長也  
此復

與某

河梁握別載離寒暑天台赤城時形夢寐僅囑伯兄緘  
札之餘附申馳眷專訊闕如蓋至今竦仄也子膺南還  
具傳嘉祉雖山川修阻而欣慰良深且知講席之旁錢  
刀并及亦時事使然而首菑山齋曾不愁寂寞矣邇者  
玄霜始肅珍攝百凡可勝遙企特附筆扇二種并寄一  
詩以呈斧削唯晒畱之故鄉風景如昨梓里近聞必有  
爲之詳者茲不更贅



與管谷

廿三日匆匆途遇訂訪藍村不意分手纔數刻忽患霍亂狼狽異常往年抱此恙只一周時今倍之矣猶未思飲啖衰壯之辨若此目下畏風倚榻百念俱靜雖不能雄談正可相對兄有意乎但弟攝疾之室別有一徑須即令來童爲前導耳不一

秋錦山房外集卷三終

先祖徵士公與親知簡牘藁多不存爲同時所推有綴錄成帙者虎林茅氏傳鈔得之遂與倦圃先生合刻其中  
有非先祖之筆而誤入者姓氏事蹟紕繆甚多先子  
當年於編成文集後訂正尺牘或得之遺墨或訪諸故  
舊釐爲三卷又前輩郵筒寸楮久藏篋笥每一展玩古  
香可愛亦附存一二以見曩賢交道之重焉列爲外集  
附刊古文詞之後孫男菊房謹志



禾金口房夕集




Table with 12 vertical columns and 1 row, currently empty.



